



柯山集
附拾遺

三



貴州省圖書館
中文書



柯山集

附拾遺

(三)

J
17.8
1.1951

張耒撰

柯山集卷十八

七言律詩

萬松亭有感

壘嶠山行穿翠微。石雲秋露濕秋衣。朦朧小睡還成夢。諷咏新詩且療饑。千里歸來人事改。四年辛苦舊容非。祇應亭下青雲蓋。依舊蒼腰聳十圍。

送壻陳景初還錢塘

乃翁風節老彌堅。嗣子清修學有傳。爲愛詩書賢事業。肯羞葛練拙包纏。經年上國勞歸夢。一棹寒流放去船。飽讀陳編勤筆硯。書來寄我好文編。

登懸弧城感吳李事

將軍戈甲從天下。丞相旌旗匝地來。堪笑怒螳猶強臂。不知蟄戶欲驚雷。咄嗟武相深冤洗。指顧山東逆境開。吏部聲名千古在。段碑何號臥蒼苔。原註韓碑既磨復命段文昌撰段碑不復見。

二月十七日欲招客飲而風霾不果有作

欲攜佳客燕高堂。園館春風又作狂。猶挾冰霜餘意氣。未分桃李好風光。青山無賴藏雲岫。流水生波黯

野塘不飲何妨還燕坐。閉門掃地獨焚香。

鴻軒下有薔薇子。初至時生意蓋僅存耳。予爲灌溉壅護。今年春遂大盛。仲春著花數百蓂。幾如芍藥。丰盛妍麗。頃所未見也。余有黃州之行。酌酒賞別。

堂下薔薇親灌溉。辛勤纔見一春花。時如轉轂無停軌。客似飛鴻不定家。一歲相邀伴寂寞。明年誰復對芳華。驅車又向黃州去。風月相望一嘆嗟。

早登望嵩樓。望少室。雪畏風不敢招客。

臨汝城中春雪消。望嵩樓上對岩巒。已披氛霧呈孤秀。未許春寒上泱寥。子晉玉笙如不隔。浮邱仙袂欲相招。便思喚客同清賞。苦畏春風入敝貂。

下春風嶺

東歸已過春風嶺。度盡千山路漸平。人事水泡能幾日。流光駒隙卻堪驚。居人落落多新屋。行店依依認舊程。世事飽諳身已老。區區來往笑浮生。

江亭別故人

津亭把酒燕西東。無復餘花一口紅。農事一春荒積雨。長淮千里駕東風。休談世事循環外。且寄騷愁醉眼中。船鼓已鳴篙纜起。客行何事亦匆匆。

讀黃魯直詩

江南宿草一荒印。試讀遺編涕不收。不踐前人舊行迹。獨驚斯世擅風流。一尊華髮江邊客。萬里黃茅嶺外州。虎豹磨牙九關邃。重華可訴且南遊。原注辛巳歲魯直見予黃州江上。

登城隍廟

靈祠孤絕壓城頭。下瞰清濠一曲流。盡日風埃昏几席。有時簫鼓祭春秋。西瞻太昊祠千樹。北望封君土一邱。旅客登臨一長望。春心容易起騷愁。

奉議楊君子姊丈也。廉靜樂道不交世俗。造道微妙。自得不耀。未六十而終。予實銘其墓。其子克一。又纂其遺文求書卷末。懷想平昔。不知涕之橫集也。

楊君冢木已蕭蕭。筆墨遺文久寂寥。墮淚交親悲宿草。長飢奴僕守空瓢。平生好事誰能繼。後世高名骨已消。欲酌一杯澆墓隧。遺魂楚些倘能招。

老舅寓陳。諸况不能盡布。以二詩代書得閒爲和佳也。

欲知老子居陳事。古寺蕭條屋數楹。幸免絕糧慚孔聖。更無環堵羨淵明。參差拙計何曾是。寵辱浮雲無可驚。斷送光陰須美酒。惟應此事費經營。

浮生已老付悠悠。未免飢寒目下憂。全仗黃庭能卻老。那堪白髮更悲秋。所欣耳界常清淨。漸放心君得自由。壘塊苦消消未盡。每逢風月亦閒愁。

贈邠老

案首句脫四字。極蒸噓。念子柯山守舊廬。盧叟今無僧送米。案此下脫四字。吏徵租。上書自薦心應恥。扶策躬耕計未疏。虎豹九關今肅穆。王門行看曳長裾。

仲夏

雲閒趙盾益可畏。淵底武侯方熟眠。若無一雨爲施澤。直恐三伏便欲然。算商酤酒有底急。束帶坐曹真欲顛。平生不解作熱客。且復飽食窺陳編。

過泗州推官王永年致仕還鄉王年四十而致仕士大夫所少也

爲憶田園便拂衣。休官退勇似君稀。塵埃擺脫青衫去。閩里驚嗟白髮稀。南畝稻梁仍歲熟。舊山芝朮入秋肥。百年從此皆閒日。寄語人間浪是非。

依韻和范三登淮亭

身如客雁寄汀洲。北望休登王粲樓。殘雪朔風驚歲晚。早梅新柳動春愁。免遭斤斧甘無用。敢向波濤較善游。奔走塵埃欲歸去。勒移恐作故山羞。

離山陽入都寄仲車

孤城芳樹碧層層。村落黃昏只見燈。廻首事如前夕夢。出門心似下山僧。仕求行道時難偶。意欲謀閒力不能。寄語東臯多釀酒。待予歸日解行滕。

題淮陰孫簿壁

荒涼官舍對淮流。樽酒相逢爲少留。夾道老椿鴉哺子。隔牆芳草牧呼牛。渡頭人散前村市。天際帆來何處舟。自古詩人最多感。新篇應解寫騷愁。

題洪澤亭

三年淮海飄萍客。今日亭邊再臘舟。人似垂楊隨日老。事如流水幾時休。閒於萬事常難得。仕以爲生最拙謀。此世定知猶幾至。遑遑奔走欲何求。

宿泗州戒壇院

樓上鳴鐘門夜扃。風簷送雨入疏櫺。老僧坐睡依深壁。童子持經守暗燈。千里塵埃長旅泊。五年憂患困侵陵。誰知避世天然子。一見禪翁便服膺。原注天然丹霞也。

宿柳子觀音寺

黃塵滿道客衣穿。古寺荒涼暫息肩。倦體收來便穩榻。汗顏濯去快寒泉。歸僧治飯挑蔬至。童子攜茶對客煎。夜久月高風鐸響。木魚呼覺五更眠。

寄滁州邵子發同年二首

夫子才豪官尙卑。窮城冷落有誰知。莫嫌五斗紆高興。且與青山賦好詩。得失可齊陶令酒。功名休問蜀莊蓍。三年流落甘憂患。一笑何當慰別離。年來萬事付禪宗。兩鬢雖青心已翁。欲借一塵希許子。更將五斗繼無功。春來行樂君應厭。老去裁詩我

未工聞道琅邪山色好。爲題新句寄清風。

雁

知時避就物之難。千里蕭蕭振羽翰。水國稻收朝食乏。海天霜重夜飛寒。烟雲秋去南山暖。風日春歸朔野寬。九萬騰陵那可測。七人憎繳漫多端。

己未早春有感

南國柳黃鶯未知。人情何事憾春遲。雪抽宿麥晴來葉。雨長枯榆曉後枝。載酒有誰尋寂寞。受薪只合學支離。近知壁觀安心法。亦擬平治不作詩。

同袁思正諸公登楚州東園樓

杖藜蕭颯對雲沙。白首逢春只歎嗟。身老易傷千里目。眼驚還見一年花。地平曠野連雲直。天帶清淮向海斜。尙有風光供醉筆。我生詩酒是生涯。

和宏父新秋詩

年年庭下梧桐葉。長爲騷人先報秋。已驚歲月悲霜鬢。更望山川歌四愁。浮生百感漫自苦。一醉萬慮同時休。瀛洲仙客莫惆悵。直泛三山烟浪舟。

送江瞻道之汝陰尉

少年相見已蹉跎。千里分攜可奈何。世路險艱知子少。人間憂慮屬予多。二年窮卷山陽客。一棹秋風潁

水波。我爲離居感身世。撥琴西望獨悲歌。

同周楚望飲華園

杖藜攜手踏青苔。瀟灑池亭爲客開。柳色漸經秋雨暗。荷香時與好風來。斜陽似欲襟詩句。新月邀將入酒杯。身世已甘長寂寞。忘形賴有子徘徊。

登楚望北樓

鼻鼻危樓百尺梯。秋風有客獨攀躋。路窮流水遠更遠。目斷夕陽西復西。簾卷似迎輕燕入。柳深時有暗蟬嘶。洞庭落葉悲騷客。鸚鵡何勞著意啼。

赴官壽安泛汴二首

西來秋興日蕭條。昨夜新霜緝縵袍。開遍菊花殘蕊盡。落餘寒水舊痕高。蕭蕭官樹皆黃葉。處處村旗有濁醪。老補一言西入洛。幸聞山水頗風騷。落泊雲隨宿雨開。西風似與早寒催。曉天雁起平沙去。霜岸風鳴敗葉來。擾擾勞生移歲月。紛紛過眼旋塵埃。求田問舍眞良策。功業應須與命偕。

過少室

驅車繼日未知勞。翠靄嵐光下褐袍。日暖峯巒開少室。雪餘松柏近嵩高。山行歲晚風霜苦。地勢西來氣象豪。勝事欲歌紛滿目。烟霞深處欲誅茅。

寄蔡彥規兼謝惠酥梨二首

自煮新酥龍旋開。秦霜猶汗紫梨腮。舊園歌舞唐宮廢。灌頂醍醐佛國來。寄我遠傳千里意。憾君不舉百
分杯。西來新味饒鄉思。淮蟹湖魚幾日廻。
洛川北岸錦屏西。竹樹蕭蕭面翠微。風月有情常似舊。山川信美不如歸。文章送老甘無用。魚鳥從游久
息機。寄語長安倦游客。年來何事素書稀。

三鄉懷古

清洛東流去不還。漢唐遺事有無閒。廟荒古木連空谷。官廢春蕪入亂山。原注：光武祠連昌宮。南陌絮飛
人寂寂。空城花落鳥關關。登臨幾度遊人老。又對東風鬢欲斑。

壽安懷古

蕭王積甲事空傳。子晉吹笙去不還。千里荒蕪山色在。百年興廢水聲間。雉飛隴麥新耕地。花落叢祠舊
戰關。旅宦遠遊仍弔古。苦無樽酒奈愁顏。

水軒書事招壽安僚友

官閒不覺簿書榮。一簟清風午枕高。靜拂小屏圖女兒。就書新竹記離騷。城空鬪雉孤飛健。柳暗雛鶯學
語嬌。東縣官曹誰過我。欲沽村酒具山庖。

連昌宮

長安王氣已消磨。弔古遺墟恨愴多。宮殿成塵新草木。邱陵無主故山河。雨餘耕隴尋遺寶。夜靜溪泉響細波。才子已銷泉下骨。百年獨諷舊時歌。

觀洛漲

雨鎖山川畫不開。洛波一夕漲如催。西來勢蹴諸山動。東轉聲包厚地迴。一片曉光吳陣甲。萬案此下脫二字。響會稽雷。何人共此乘桴志。直到蓬瀛亦壯哉。

芳華閣

玉仗無蹤輦路摧。舊名猶得榜高臺。月斜曉樹鳴鶉鷄。日暖春蕪放雉媒。清洛夜聲縈谷轉。錦屏晴色照人來。淒涼滿眼興亡恨。誰是蕪城作賦才。

福昌雜詠五首

張翰飄然欲餽鱸。周南久客意何如。風悲故國荆榛地。日落空城雉兔墟。明月搗衣聞洛杵。故人憑雁寄南書。旅歌辛苦空彈鋏。誰念朝盤未食魚。

東望川原拱別都。漢唐冠蓋已邱墟。地橫嵩少雄中夏。天險輾轅困萬夫。宮殿荒涼興廢恨。山河慘淡戰爭餘。登臨不見淮南道。只有風塵滿客裾。

乘雲飛去不辭家。女兒荒祠一逕斜。溪入亂雲鳴佩玦。樹蟠蒼石老龍蛇。夜寒玉鏡懸清月。天碧霓衣曳彩霞。陵谷易遷塵骨老。衰顏更欲服丹砂。

天倚岡巒翠萬重。倚樓搔首更書空。莓苔古屋荒秋雨。草木空山起夜風。漢帛北來遼塞雁。楚招南望憶江楓。塵埃流落悲生事。白髮年來擬見攻。滿目淒涼供客愁。斷霞殘照想滄洲。風雲蕭瑟三川夜。星斗縱橫萬壑秋。騎省衰遲空作賦。荆蠻畱滯感登樓。迷魂不待巫陽些。自有騷詞繼遠遊。

福昌

故苑芳華路已迷。連昌宮闕露沾衣。繁華冠蓋當時事。戰伐山河萬古悲。野色蒼涼新雨地。秋聲蕭瑟夕陽枝。塵埃未有東歸計。天畔登臨且賦詩。

牛谷口

十萬全師一戰擒。谷盤蒼破路幽深。淒涼今古興亡事。遼闊英雄割據心。漲洛暮連諸谷雨。秋雲低抱半山陰。文皇功業今何處。磨滅荒碑蔓草侵。

歸馬二首

歸馬駸駸不受鞭。晚霞如畫照晴川。蕭疏黃葉孤舟岸。零落秋雲斷雁天。臨水登山悲楚客。烹雞酌酒愛諸仙。任從老逐霜毛至。莫遣愁來玉盞邊。

蕭蕭雙鬢獨驚秋。病眼天邊暮倚樓。已老馮唐猶不遇。思歸庾信正多愁。溪通積雨流方壯。山入重雲翠未休。一夢淮南經歲別。菊林還向洛陽浮。

官舍歲暮感懷書事五首

衙鼓寥寥送夕陽。經時無客上高堂。淵明柳老秋多雨。子敬氈寒夜有霜。山樹葉稀晴摘果。齋爐灰暖曉焚香。經綸自有英雄在。閒散須教屬漫郎。

脩竹高槐交映門。公居瀟灑近山雲。醉眠多似陶彭澤。官況貧于鄭廣文。秋菊擣塵供曉餌。寒松收子和香焚。經年門巷無車馬。只有清風伴此君。

霜菊娟娟尚有花。蕭條廳樹暮啼鴉。萬竿脩竹開侯府。十里青山隱相家。麋鹿並遊諳野性。詩書相對是生涯。冷官自有貧中樂。敢向朱門肉食誇。

北風吹雁去翩翩。流滯周南又一年。田爲歲荒陶令秫。酒無人乞廣文錢。香籠鉢水清晨咒。坐煖蒲團後夜禪。更謝晴明好山色。數峰殘雪在簷前。

筆牀茶竈素園屏。瀟灑幽齋燈火明。木落風霜初十月。坐寒星斗欲三更。消磨永夜書盈案。分付閒愁酒滿觥。於世愈疏身漸老。官閒何苦厭山城。

望女兒雪

萬戟高攢女兒晴。卷簾初見雪崢嶸。光迎曉日峰千疊。氣入陰風夜五更。晴色北臨秦甸白。寒威東抱洛陽清。坐看溝壑承餘澤。付與春田次第耕。

永濟橋

墟廟無人弔毀垣。故橋遺址至今存。侵波野岸生新草。齧石老沙留舊痕。金殿有基藏兔穴。玉輿無路半樵村。甘棠古道輪蹄斷。落日空山暮雨昏。

雪晴野望

蕭蕭空谷隱山雲。渡水人歸何處村。樵逕雪迷唐苑路。鳥聲寒集漢祠門。公堂吏散惟脩竹。近嶺林疏見飲猿。客坐無氈君莫笑。陶潛亦有酒盈樽。

福昌南望

朝市推遷不復還。暮雲平野水潺潺。山川寂寞繁華後。都邑蕭條魚鳥閒。鶴柱千年無故老。仙棊一局換人閒。興亡今古知何極。莫向雍琴妄慘顏。

戒醉

平生嗜酒愛離騷。痛飲須知屬我曹。仕宦低回要斗粟。功名迂闊欲霜毛。直須減省樽壘費。莫厭沈迷簿領勞。醉吐相茵君勿恃。丙公遺事久寥寥。

醉宿慈氏院晨起

痛飲淋漓半夜醒。披衣坐待曉窗明。風松一夕清無限。爐火三更煖有情。孤閣鳴鐘天黯慘。寒山戴雪晚崢嶸。年來漸向深杯怯。強學劉伶欲解醒。

梅花

北風萬木正蒼蒼。獨占新春第一芳。調鼎自期終有實。論花天下更無香。月娥服馭無非素。玉女精神不尙穠。洛岸苦寒相見晚。曉來魂夢到江鄉。

送丁宣德赴邕州僉判

邕南亭障久消兵。莫厭扁舟萬里行。嶺外山川從古秀。幕中談笑屬時平。天連漲海鵬飛近。風卷孤城颶母生。勿爲跼齋思款段。古來男子重功名。

同陳器之題迎福院軒

東風吹面酒盈樽。臘後一番梅柳新。殘雪作寒山向晚。橫烟不動野浮春。地留京洛豪華氣。川帶秦韓戰伐塵。今古悠悠君莫問。祇應沈醉是天眞。

春陰二首

漠漠重雲向晚低。臘寒新去有餘威。風捎簷滴難開幌。潤引爐香易著衣。把酒自傾金錯落。探春誰汗錦障泥。山城冷落無歌舞。只有芳醪取次攜。

溪樹昏昏鎖暮雲。晚山愁黛對含顰。不甘小雪猶妨暖。長恨閒陰每占春。寶帶金貂侯第客。鈿車珂馬帝京塵。王城自古繁華地。回首高歌悵望頻。

寒食贈遊客

陰陰晝幕映雕欄。一縷微香寶篆殘。寒食園林三月近。落花風雨五更寒。箏調寶柱絃初穩。酒滿金壺飲

未乾。明日踏青郊外去。綠楊門巷繫雕甍。

登穀州故城

控扼兵屯事已遼。傾欹遺堞隱蓬蒿。春蕪滿野牛羊散。秋稼連雲雉兔驕。苔臥斷碑昏故刻。雨飄殘碣帶餘燒。人閒興廢知何極。莫謂荆榛便寂寥。

東池

東池暮春風景妍。汨汨淺渠鳴細泉。菖蒲遶隄青似劍。荷葉出水大如錢。薔薇著花方未已。楊柳飛絮任飄然。鄰翁芍藥正足雨。預計開時須醉眠。

暮春贈陳器之

牡丹開過解鞦韆。鶉鷄鳴時三月天。盡日好風吹絮雪。一池春水泛蓮錢。溪邊蒲筍供朝飯。堂上圖書伴晝眠。端坐窮城何所得。只收風月入新篇。

離光山驛

郵亭結束問殘更。斜月西南雞未鳴。草草勞人常少睡。縣縣遠道苦無情。田家稔熟人情好。野路雨餘秋氣清。老得一州藏拙去。鷓鴣臺閣盡豪英。


內生日

從我奔馳走四方。清貧殊不厭糟糠。黔婁環堵貧常醉。壽母高堂老亦康。夷險百爲吾有命。窮通一意子

真剛。今年生日心無事。好爲兒孫舉壽觴。

次韻張公遠二首

襄王坐上微詞客。子建車前步水妃。警過低鬟流盼處。爭先含笑獨來時。東邊日下終無雨。闕上書時合有碑。腸斷吳王烟水國。扁舟何日逐鷗夷。
平淡春雲捧額浮。秋光劍戟近人流。無腸可斷方爲恨。有藥能治不是愁。可待挑琴知有術。未傳驅豆更無謀。遙知添得春窗夢。尤在樽前燭下羞。



柯山集卷十九

七言律詩

和陳器之謝王灑池牡丹

十首新詩換牡丹。故邀春色入深山。御袍黃粉天然薄。醉臉胭脂分外殷。原注：所得牡丹，有御袍黃，滌色紅二種。開晚，東君留意厚。原注：奇者開常晚。落遲晴晝伴春閒。原注：洛人以暮蔭花，可留半月。狂來滿插烏紗帽，未擬尊前感鬢斑。

和聞鶯

冉冉東風萬柳絲。啼鶯常自與春期。妝殘玉枕朝醒後。繡倦紗窗晝夢時。文羽自奇非谷隱。好音應合有人知。風流潘令多才思。爲爾春來幾首詩。

同器之遊大宋陂值雨

微雲護日曉陰陰。春去餘芳尙可尋。詩倚醉豪連卷寫。酒逢勍敵百分斟。山光左右雙屏畫。雨腳崢嶸萬羽林。沙路晚晴歸馬疾。一梳新月上烟岑。

和陳器之苦雨

急雨淒風未肯歸。三川烟樹遠淒迷。瀉山張潦千霆怒。到地重雲萬幕低。擾擾泥塗同野鷺。蕭蕭昏曉聽鄰雞。爲君一借扶搖便。靜掃平郊散馬蹄。

依韻和晁十七見招之什

斷送春光酒萬壺。敢辭羸馬爲君驅。桑田日暖鳩呼婦。楊柳葉深鶯哺雛。詩冷有情尋水石。年豐無盜起萑蒲。河陽潘令風騷客。醉倒樽前許我無。

鹿仙山

溪清山秀隱神仙。乘鹿真人去幾年。天地壺中無客到。方書肘後有誰傳。秦皇採藥迷蓬島。漢武燒金得紫烟。眞境寥寥在何處。未容塵世妄攀緣。

寄晁應之二首

強讀詩書歎白頭。一官飄泊寄東周。匏瓜有繫身難去。人足無音境更幽。晚接賢豪寬病思。老將文字寫離憂。相思一夕親談笑。夢斷雲山相對愁。瑜珥瑤環豁眼明。碧梧翠竹照人清。同車汲黯今難仗。挾彈潘郎舊有名。自是風流襲家世。行看談笑取公卿。塵埃落魄誰如我。一事無成白髮生。

喬木

舍北參天喬木長。依憑清蔭護高堂。鳥啼杳杳重陰合。風到翩翩翠葉涼。已許孤高凌夏日。不妨堅老要

秋霜。投身麋鹿無人地。非爾煩憂未易忘。

竹堂

誰道清貧守冷官。遶家十萬翠琅玕。直應流水深相與。不待清風已自寒。學得鳳鳴真自許。化成龍去不終蟠。知君何世無來者。可是王郎獨與歎。

夏日二首

詩書老去信無功。偷得閒官許養慵。山影當庭初轉日。水聲穿竹自來風。晚催萱葉昏還斂。日射榴房午更紅。覽物賦詩成底事。蕭蕭雙鬢欲衰翁。重雲卷雨過山來。遍洒中田到曉迴。錯落晴山移斗極。陰森暗峽宿風雷。佳人夜夜齊紈恨。騷客年年鶻鷁哀。欲見清秋近消息。月明白露溼蒼苔。

至日有感二首

兩逢至日驚身老。遠寄西南覽物悲。佳節風烟長慘慘。他鄉人物自熙熙。荆榛嶮澗秦關破。草樹芳華隋苑隳。原注。隋有芳華苑在邑東。悵望高歌一回首。茲辰樽酒莫相違。

一臥孤村兩見冬。獨搔華髮思無窮。荒山極目漫汗雪。老樹當庭晝夜風。佳節妻兒具尊酒。茅齋斟酌慰愁翁。未央曉賀瞻天冕。正在煙爐縹緲中。

歲暮福昌懷古四首

穀州故城

原北荒城舊穀州。文皇功業莽悠悠。天戈揮去開東夏。金甲歸來獻二囚。想像英姿揮日月。蒼茫故國委林邱。山川慘慘空回首。落日悲風蔓草秋。

張子房

謀臣何世不知名。誰與留侯敢抗衡。籌下興亡分楚漢。幄中談笑走韓彭。懼誅老將爭梟首。高臥成功更養生。戡亂直須希世哲。乘時兒女漫縱橫。

李賀宅

少年詞筆動時人。末俗文章久失真。獨愛詩篇超物象。祇應山水與精神。清溪水拱荒涼宅。幽谷花開寂寞春。天上玉樓終恍惚。人間遺事已埃塵。

連昌宮

欲問興亡已慘顏。桑田滄海變人間。無情野水青春在。不動南山白日閒。伐木清溪寒剝啄。鳴禽高柳曉緜蠻。蛾眉皓齒終黃土。誰道仙宮有使還。

以病在告寄楊器之

飲冷寒中不自支。故應病骨易尪羸。老人素懶何妨臥。太守兼容得自私。雨汗欺風元自溼。火雲挾日故行遲。江樓清絕真孤負。正是齋居禁酒時。

予元豐戊午歲自楚至宋由柘城至福昌年二十有五後十年當元祐二年再過宋都追感存歿
悵然有懷

宋玉臺前官樹林。十年孤客獨沾襟。白頭青鬢隔存歿。落日斷霞無古今。暮雲梁苑雁鶩暗。久泛吳船江海深。閱世悲歡嗟老眼。呼兒取酒十分斟。

宿馬莊寺

我馬衝泥僵欲仆。空村落日不逢人。開門野寺淨如掃。迎客老僧閒更真。佛案青黃園果細。齋廚汲洗野蔬頻。年來到處無餘念。靜對同龕金色身。

永城道中

東行十日何所有。衰草白茅梁宋陂。大風官樹吹半折。欲雨野雲垂不飛。十年所遇半陳迹。千里獨愁懷所思。他日江湖片帆去。白頭青鏡久相期。

贈柘城簿王微之

青衫得祿苦不足。白髮生頭頗有餘。賦就相如猶滌器。原注。王作宋都賦。詩成賈島獨騎蹇。先生五斗不掛眼。漫郎一官聊讀書。自古好賢慚好色。何人朝夕駕于株。

夜泊泗上阻風雨

雨昏古岸斷人迹。天黑孤城閉水關。燈火樽前初擁膝。風雲淮上欲移山。避人魚鳥那足怪。吹浪蛟龍不

自閒便使乘桴亦何事。滄波歲晚合知還。

喜七兄疾愈二首

淨名居士本非病。五禽先生能養身。家人但訝少林觀。鄉里不知顏子貧。身內固知精是藥。人間惟有道通神。喜聞漸離烏皮几。花氣晴來欲逼人。

南鄰隱士龍虎鼎。原注。陸先生平叔。有道之士。東寺比丘堅密身。原注。圓明師戒行無玷。欲知十室有信處。顧此兩賢非世人。戰勝天魔初起定。原注。七兄已斷世緣。寶成丹竈不妨貧。原注。兄新悟道祕。何時共此閒居士。紫領長衫樂社神。

送曹子方赴福建運判

平生鄴下曹公子。家世風流合有文。橫槩尙傳瞞相國。紫髯不是畫將軍。詔書寬大民何怨。刺史威嚴吏合勤。好作楚詞更下里。雲中一降武夷君。

次韻盛居中夜飲

吳衣厭拂洛陽塵。夢寐一樽漫海濱。每願脫巾常漉酒。况逢投轄苦留賓。蒼龍挂斗寒垂夜。翡翠浮花暖作春。上界高真足官府。追隨卻屬散仙人。

送麻田吳子野還山

麻田老仙身馭風。萬里一息如飛蓬。行窮山川出天外。閱盡世界歸壺中。經過賣藥句漏客。鄉里高年南

極翁我亦有心遊八極。從公一借葛陂龍。

和无咎二首

年芳經雨能幾許。客愁得暖不肯融。眼看乳燕行已哺。手種小桃隨分紅。世情付睡莫涇渭。物態逢春舞異同。清時賴是未禁酒。須惜紅紫轉頭空。
愛酒苦無阿堵物。尋春奈有主人家。未容黃蜂釀成蜜。已怕惡雨不容花。雲間明月誰可攬。海中蟠桃良未涯。浮名誤人不得脫。黑髮減來那復加。

和門下相公從駕幸學

繼聖文明舉舊章。儒宮傳蹕駐膠庠。地疑闕里絃歌宅。經奏周書隸古行。遣子東夷思入學。受成西旅佇來王。魯侯在泮猶歌誦。盛事須刊孔子堂。

效白體二首

功名富貴付悠悠。高臥山城又過秋。燕坐香燈爲靜侶。閒行麋鹿是同遊。青黃草木新霜過。瀟灑溪山夜雨收。回首十年梁苑客。枉教白卻少年頭。
州貧須惜尊疊費。俗陋兼無妓樂名。幸有蒲團供燕坐。不妨藜杖助閒行。看炊香稻供齋飯。自採寒蔬試野羹。身外無營內無事。近來心氣儘和平。

效白體贈楊補之

青衫居士斷葷血。一榻蕭然如在山。堂下黃花驚歲晚。尊中綠酒覺官閒。胷中已了一事大。鏡裏莫驚雙鬢斑。我亦久懷伊洛興。煩君先爲卜禪關。

雙槐晚秀三月一日初見新葉

東皇無處著繁華。亦復分張到我家。他日老蒼悲敗枿。今晨嫩綠出新芽。禿翁承弁纖纖髮。村婦簪鬢草草花。桃李蹊中人絕跡。綠陰門巷正藏鴉。

休日不出聞西池遊人之盛

三日春風塵漲天。溝池愁汗破鞍韉。掃門靜閉無來客。隱几深居學坐禪。薄雨掠塵時點點。細蟾窺夜獨娟娟。都人解與殘春競。半在西池聽管絃。

送李公輔赴宰宣城

與君騎竹卽同遊。抱子相看髮已秋。莫惜往來勤馬足。未須容易轉船頭。君方搜句窗間岫。我已懸情天際舟。抱槩石渠無所欲。勞君時致管城侯。

休日不出

久厭衣冠塵土侵。賜休何苦馬駸駸。窮冬積雪春不雨。昨日殘紅今綠陰。卻掃不知門外事。安禪深得靜中心。讀書陶令非求解。禁酒揚雄不得箴。

次韻王敏仲至西池會飲

聖朝無復用舟師。戲遣艤幢插戟枝。沸浪有聲黃帽動。春風無力彩旗垂。不勝杯杓寧辭醉。傳語風光共此嬉。遠比永和真繼軌。臨摹蠶紙看他時。

次韻王敏仲池上

春晚餘芳尙可尋。晴雷沙岸走車音。苑分廣樂和聲度。池受晴天倒影深。席上宮花輝御體。坐中瓊樹閒瑤林。歸人自畏嚴城鼓。卻望橋西日未沉。

題外甥楊克一詩篇末

十年不復上天津。閒卻西都幾度春。里巷夢中迷向背。山河句裏見精神。藝成斧鑿眞須棄。學富篇章自不貧。莫倚詠兒兼贈婦。須知漸與老爲鄰。

題李方叔文卷末

他日東坡譽子文。瀾翻健筆欲凌雲。決科正爾眞餘事。射策如何但報聞。詭御獲禽雖可鄙。挽弓射葉亦徒勤。莫辭更擬相如作。寂寞思元未放君。

劉景文許惠氈裘未至督之

案首句脫五字。氈毛柔于春絮膩于膏。蓋鹽倦客愁無褐。案此下脫五字。贈袍雅服何妨冠蘇帽。瘦腰兼稱束郡條。想公封寄應多憾。不挂長身襯佩刀。

未嘗病痺親友以酒爲戒作小詩戲答

離騷僅得比痛飲。旨酒何曾廢善言。因病細斟尤有味。無人獨酌亦成歡。何須巾漉醅浮蠹。不待杯邀月入樽。但看井眉瓶作土。鷓夷仍自穩隨軒。

和呂與叔祕書省觀蘭

千里猗猗誰取將。忽驚顏色照文房。每憐墜露時施澤。更許光風爲汎香。獨秀已先梁苑草。託根寧復楚天霜。坐令黃菊羞粗俗。只合蕭條籬下芳。

次韻秦七寄道潛

衰疲久厭五更朝。每愧冥鴻在次寥。顧我塵冠彫舊鬢。愛君山桂長新條。文詞畫虎工逾拙。世事春冰老益消。只欲歸依香火社。高堂時聽法音潮。

和宋二上元迎駕

拜揖清光咫尺閒。雕輿欲動更移班。蓬萊不動鰲頭穩。閭闔未開天上閒。老去一官差簡策。春來歸夢滿淮山。自慙衰病獨隨俗。醉逐遊人月下還。

和張提舉

案首句脫五字。國東自慚多病幸優容。喜來丈室談何妙。案此下脫五字。莫從宛水春生初縹緲。鍾山雪盡見蟠龍。新年強起尋芳物。零落宮梅白一重。

晴窗浴罷試春衣。芳草江南三月時。陰合園林禽語樂。風和庭院絮飛遲。漫郎官事只畫諾。騷客生涯惟賦詩。極目江天已多恨。何須木落長年悲。

和上維道祈雨有應

江鄉長夏亢陽驕。太息秋原稻穗焦。暑氣暮收秦地火。原注。項羽火成陽。三月不息。雨聲秋響浙江潮。原注。五月雨勢甚大。夜齋涼送簷間滴。曉枕清聞竹上飄。椒醕禮神慙德薄。聖朝當寧四時調。

早秋感懷

一行爲吏百事廢。幸此村州終日閒。莫疑虎兕率曠野。正見虎豹守天關。櫛簾晝靜燕已去。陂澤風高雁欲還。老見功名真戲事。惱人何苦鬢毛斑。

木芙蓉菊花盛開

空山岑寂何所有。晚菊芙蓉相對幽。伴我悠悠過閒日。憐渠灼灼媚窮秋。清香但欲持供佛。醉舞何妨插滿頭。此生萍梗難前料。知復明年相見不。

正月八日坐局沽酒

爲問里閭何蹀躞。上元楚俗習張燈。新春此時最佳處。獨我坐曹如定僧。霜林夢澤蒼茫野。烟草江邊寂寞城。小飲未能來喚麩。雙眸終日冷如冰。

神宗皇帝挽詞三首

獨化陶鈞運聖謨。八方寥廓入雄圖。將軍已勒邊山頌。博士初修玉檢書。西望忽驚新石闕。東來不是舊金輿。編年誰秉丹青筆。流落周南一腐儒。
三百年成玉鼎丹。縞帷驚變紫宸班。遺弓有淚哀何及。嘶馬無蹤去不還。霜露無情金闕暗。山川常在石麟閒。青衫曾賜當年桂。欲附龍髯不可攀。
風霆武略走夷蠻。雲漢文章著不刊。萬世基扃傳夏啓。百年威德畏軒轅。月游渭水儀空在。舞罷西陵淚未乾。腸斷反虞歌徹後。滿山松柏夜霜寒。

太皇太后挽詞

坐安民物由修己。默合神明爲至公。他日已占懷月夢。後來方信補天功。四時化育坤無事。六合清明日正中。九載憂勤已陳迹。空留雙闕對青嵩。

范忠宣挽歌二首

晚生長恨老成空。猶及風流正始中。經國謀猷號名相。傳家正直似先公。回天巨力章猶在。拯溺深言老更忠。誰念人心弔邦國。新阡客泣白楊風。
瀟湘臥病弔纍沈。賜詔君王用意深。多士方懷宣父日。蒼生竟失傅巖霖。氈裘他日瞻吾父。丹扈何能附舊箴。白首門生恩未報。悲詞空想薤歌音。

黃幾道哀挽

風流正始久無聲。頗復因公到後生。千里族人分俸祿。百年鄉黨守題評。青雲脫屣烏臺峻。白首含香畫省清。但得將軍桃李在。寧須公相寫銘旌。

鄧慎思學士挽詞

青衫獻賦逢知己。白首耽書還誤身。名著道山傳故事。政行兩郡泣遺民。文成典午羣疑泮。原注。常注晉書。詩和少陵佳句新。歎息苦身成底事。湖墳宿草已愁人。

潘處士挽詞

異時輕士老才良。況復程能翰墨場。酒裏浮沈真得計。生涯落魄定何亡。德尊故社江山永。文付諸孫虎豹章。環堵如今空五柳。蕭然風物似柴桑。

挽李少卿

幾年林下遠埃塵。儒雅風流誰與鄰。筆尾病來猶壯健。詩情老去更清新。幽齋昔日琴書換。新塚東風草木春。懷想只疑高興在。一吟遺句淚沾巾。

七言長律詩

上文潞公生日

盛德元勳絕等倫。麟符虎節冠宗臣。靈椿上古身千歲。一柱明堂力萬鈞。伐叛豹韜威尙凜。刊名金鼎鑄

來新風謠四海古賢相。笑詠山川是主人。萬里山河供氣概。九秋鵬鷲入精神。光華稷契無窮譽。強健喬松不老身。坐鎮熊羆瞻繡袞。燕居松鶴伴綸巾。只應便是神仙事。方丈蓬萊卻未真。

至日有感

前年至日在何處。寒事蕭蕭客許昌。乞火夜溫行客酒。披裘曉冒五更霜。暮投陽翟荒涼驛。正見人家燈火光。飢馬臥嘶毛瑟縮。羸童曉對色蒼茫。一年旅宦孤村僻。東望歸心洛水長。佳節幾逢長索寞。我生何事苦淒涼。更無賓客青山滿。只有風霜老樹蒼。昭代寧須厭留滯。馮公白首任爲郎。

清明臥病有感二首

支離臥病逢佳節。漂泊西遊寄洛城。重帽畏風惟益睡。青筇扶步不禁行。紅飄殘萼知風急。綠滿新枝聽鳥聲。不見賈生遺宅處。空傳金谷舊園名。悲歌身世驚將老。悵望古今空復情。笑看家人競時節。爭持新火照清明。

飄萍著處卽爲家。伏枕悠悠對物華。處處鞦韆競男女。年年寒食亂風花。藥囊親坐勞頻檢。酒甕生塵亦可嗟。未老會尋吳市卒。苦貧須種邵平瓜。雲烟南望羣山會。水樹東浮去路斜。行止此身應有命。不須辛苦問生涯。

柯山集卷二十

五言絕句

江上二首

相別亦何事。相逢盡偶然。
愁腸貫綵筆。離夢繞朱絃。
紛紛渾是夢。黯黯只消魂。
江上浪無限。舟中酒一樽。

暇日六詠

雙白鴨

已斷鷹隼猜。仍叨主人惠。
皎潔靜天姿。雙棲莫相忌。

蛙

越國未忘吳。會動君王意。
句踐自有心。憑車汝無恃。

百舌

曉語月斜樹。晝啼春霽天。
胸中自有激。不是故多言。

柳絮

零亂委空風。悠颺點芳草。卻爲身最輕。華堂等閒到。

龜

映日漾清淵。沿沙暴元甲。愛爾千歲姿。藏身一蓮葉。

槐庭

清陰滿我庭。蒼蒼六槐老。野性苦避人。青苔不須掃。

春日書事

禪宮門寂寂。庭草無形迹。東風自掃階。疑是開簾客。

鹿邑道中

去歲秋時去。今年秋又來。浮名何所得。歲月苦相催。

予元祐六年六月罷著作佐郎除祕書丞是歲仲冬復除著作郎兼史院檢討復至舊局題屏

庭樹應如我。相逢益老蒼。別來秋苦雨。但覺瓦松長。

絕句

雨麥渾漫壠。風梅已退穠。高鴻望燕塞。飛疾不成行。

晝臥口占二首

人事日益遠。秋居何颯然。苔隨牆半雨。葉放樹中天。

擾擾終何得。蕭蕭亦自如。將求解牛道。要解斲輪書。

發金陵折柳亭二首

忽忽十日事。回首亦淒涼。何處無芳草。行人休斷腸。
瞿曇昔教我。林下一宵行。何事春江上。依依作俗情。

昔蘇先生遊廬山詩云。平日懷真賞。案蘇軾集作自昔懷清賞。神遊杳靄閒。如今不是夢。真箇有

廬山案有字蘇軾集王氏注本作在施氏注本作是輒繼一首

人生孰非夢。夢裏見廬山。若了元無夢。何曾有往還。

蘇先生詩云。芒屨青竹杖。自掛百錢遊。何事春山裏。案蘇軾集何事作可怪。人人識故侯。輒繼其

後

齋心禮仙聖。不是愛山遊。山中笑何等。白髮故諸侯。

六言絕句

登山望海四首

江闊風烟易晚。山高草木先秋。獨倚闌干盡日。此身與世悠悠。
仕宦此身漫爾。功名已老茫然。山鳥不須驚客。相親此復窮年。

西望揚州何處。雲中雙塔巘。山外雲濤斷日。夕陽應近長安。
鳥去蒼烟古木。人歸綠野孤舟。信美雖非吾土。消憂且復登樓。

書寺中所見三首

江市樵蘇早散。山家燈火常昏。紗帽搯筇獨立。龕中佛像無言。
日出鄰僧乞食。鐘鳴老叟關門。誰見春宵淨境。娟娟霽月當軒。
叩戶誰驚午睡。烹茶聽客論詩。病裏雖成禁酒。興發何妨杖藜。

讀潘郎文卷

霜鬢我猶譎宦。蝟鬚子合封侯。老拙何勞咄咄。疏慵且復悠悠。

夜坐三首

門庭草草是客。寢室泠泠似僧。春寒猶須篝火。夜書頗復明燈。
靈通寺前老圃。畦蔬想見如雲。謀拙嗟予飄泊。歸來與爾知聞。
微寒騷屑窻竹。淡月朦朧夜天。路暗城頭傳警。漏稀更士高眠。

贈廣靖上人

七十龐眉禪客。曾見天衣老人。旃檀林中香氣。悠然時有餘氤。

青春要去便去。美酒得斟且斟。莫問世間蹀躞。須知老境侵尋。

乾明院門望江山懷淮陽南步二首

危臺寺東野水。春來柳色鵝黃。江上滄波似屋。蛟龍作惡難量。憶昨淮陽把酒。目前惟欠山林。江上雲岑千疊。何爲特地愁心。

和子瞻西太一宮祠二首

太一儲祥世世。祠宮歲事年年。絳節霓旌何處。松庭玉座蕭然。玉笋清晨薦酒。天風靜夜飄香。風吹管截孤竹。琴絃曲奏瀟湘。

白沙閘西艫舟亭下二首

倦客時時醉眼。津亭日日春寒。目極傷春懷抱。黃昏猶在闌干。客恨如雲冉冉。風光似水迢迢。回首十年舊事。令人淚盡魂消。

秋園雜感二首

秋晚園林疏靜。天高風日明鮮。中有搢笻病客。三杯卯酒醺然。世事我深諳委。人生他自奔忙。剡木牽絲作技。幾回弄罷淒涼。

七言絕句

寄都下舊友二首

一別長安西復東。琵琶舊地已應空。當時風景歸何處。須信人生是夢中。
城西古地昔同遊。望月思家相對愁。明月秋來應更好。何人看月又悲秋。

秋思

故人陳迹生蛛網。古殿苔深疊綠綰。簷雨晚秋鳴槁葉。窗風深夜觸孤燈。

魚蝦相望

悲歡回首兩茫然。幾別龍門又半年。應是舊時歌舞處。和風開凍一層天。

臘月殊有春意二首

一夜長風無片雲。曉來風動似初春。應知春近催桃李。更有輕寒不著人。
拂檻垂楊雪後青。誰家朱閣曉來晴。拂簾動幕無人解。先把春愁寄有情。

送李十之陝府

斷蓬泛梗偶相依。一別重逢又幾時。人世悲歡消遣盡。爲君流淚忽霑衣。

送客愁

數星點點閒微河。城上三更樹影暎。霜落夜深風悄悄。月明無限客愁多。

夜坐

半消爐火夜三更。欲滅青燈暗又明。閉戶無人瞑目坐。此時一念悟浮生。

予向集賢殿試罷。寓居京師。嘗遊西岡錢昌武郎中之第。時同會者河東柳子文與錢氏三子夏中。予出京今纔半年。而昔日所遊者。或東或西。有不知所之者。古人所謂俯仰之間。已爲陳跡者。歟。夫求昨日之我。于今日。終其身而不得。而况偶然相值。聚而旋散者。歟。追記春睡詩一首。乃寓錢第所爲者。

東風冷峭著衣寒。雲影陰沉美睡天。青杏園林花落盡。晚風吹雨溼鞦韆。

上元都下二首

淡薄晴雲放月華。晚穠新暈臉邊霞。管絃樓上爭沽酒。巧笑車頭旋買花。駟馬金鞭白面郎。雙鬟小女坐車箱。輪聲轆轤歸何處。留得紅籠絳蠟香。

荆軻

燕丹計畫問田生。易水悲歌壯士行。嗟爾有心雖苦拙。區區兩死一無成。

送聖民出城卽事

東風隄上送行人。漸出城來漸少塵。柳色已深花又落。客來下馬獨傷春。

西湖三首

沙鷺汀鷗盡日閒。水邊風起萬荷翻。客來莫厭重樓望。樹杪闌干直對山。

水上亭臺涼氣多。扣舷倚棹唱吳歌。何人爲放青蓮出。翦卻翻翻一萬荷。
九曲清池柳岸風。長苗新稻短蒲茸。功名由命何須問。幸有滄浪作釣翁。

別錢筠甫三首

倦客無眠聽曉鐘。五更蠟燭淚銷紅。城西古寺來何處。今日分攜獨向東。
春燈欲盡曉雞啼。殘月影中征馬嘶。爲語相逢不消喜。相逢終有道分離。
原頭綠盡柳初芽。落月滿川風滿衫。已過寺西三十里。爲君回首駐征銜。

偶題

屋角纖纖掛斷虹。清蟬一噪起高桐。天涯雲盡見殘日。林下雨餘來好風。

宿錢睦甫南齋

瀟灑南軒與病宜。庫牀長簾碧紗幃。三更月上夢初覺。竹影滿窗風入衣。

夜

斗柄闌珊風瑟瑟。銀河錯落露森森。人聲靜後幽蟲急。月色好時清夜深。

田家二首

門外清流繫野船。白楊紅槿短籬邊。早蝗千里秋田淨。野秫蕭蕭八月天。
新插茅簷紅槿籬。秋深黃葉已飛飛。灘頭水闊孤舟去。渡口風寒白鷺啼。

謁僧不值

古寺人閒僧掩扉。客來下馬解塵衣。雙松帶月風蟬噪。古閣鳴鐘夕鳥歸。

中秋夜酌

一片秋天碧萬尋。月華初上水沉沉。遺愁不用先愁醉。更看清光到夜深。

舟行六絕

獵獵西風秋水清。野花寒草傍流生。沙邊水鶴待魚立。石底暗蛩先夜鳴。
船尾初回轉野灣。波平天淨惜投竿。飛飛小蝶秋花晚。嘖嘖沙禽野水閒。
落景秋雲晚不開。天寒古岸野船回。初驚波面微瀾起。已覺風前細雨來。
渡頭風雨晚生寒。蓑笠漁翁坐釣船。爲問篷中有魚否。一雙新鰕出籠鮮。
天寒野店斷人行。晚繫孤舟浪未平。半夜西風驚客夢。臥聽寒雨到天明。
渡頭烟雨欲昏天。灣畔枯桑繫客船。風打篷窗秋浪急。一杯寒酒夜深眠。

書穎州皇甫祕教書室

閒來便是日侵塔。窗下棋枰林下杯。曉解扁舟又南去。百年還得幾回來。

初離陳寄孫戶曹兄弟

三年流落寓于陳。一領青衫淮水濱。城北橋邊長送別。扁舟今自作行人。

望淮山破石寺予幼年過處今十載矣

一年落泊竟何成。人事紛紛幾廢興。今日扁舟淮上去。青山似與客相迎。

題壽陽樓二首

渺渺長淮去不留。行人獨上壽陽樓。一闌長歌不須唱。山川都是舊時愁。
長淮不斷水悠悠。樓下行人淮上樓。誰謂滿前風景好。古今供作別離愁。

淮上曉望

酒醒窗明月半川。怯將病齒漱寒泉。樓西別有清秋色。一片淮山在曉煙。

宿南山普濟院

閃閃青燈照薄幃。幽人不寐自吟詩。僧來邀我更深坐。待聽山風到樹枝。

飛翼肯向霜林借一枝。

旱池

藕梢菱蔓綠纒深。日射游魚聚岸陰。陶沫已知爲計盡。渚鷗沙鷺亦何心。

湖上成絕句呈劉伯聲四首

湖北風來吹曉鐘。湖邊漁客閉船篷。波光不動天光闊。更任浮烟細雨中。
浩蕩雲容不成雪。柳偷春色放衝寒。湖邊艇子衝烟去。天畔青山隔雨看。

掠岸北風歸客愁。浮烟不動雨飈飈。圍成野色縈紆岸。點破湖光三四鷗。
誰道原頭春未回。柳梢黃軟凍齊開。爭驚臘日崢嶸盡。忽問田翁乞野梅。

偃王城

蔓草悲風和幾秋。黃桑晚葉野雲愁。偃王城下樵蘇盡。猶有耕人指舊印。

自上元後閒作五首

閭闔樓南粉署西。舊時種柳長應齊。如今冷落窮山縣。臥聽春風百鳥啼。
東風吹雨夜侵階。樓角長烟曉未開。何事舊時愁意緒。一番春至一番來。
面冷春霜拂瓦乾。曉風吹雨凍闌干。柳梢黃弱梅苞破。更放東君幾日寒。
燈火人家夜不收。三更明月過南樓。風煙隨處自能樂。何事客心還獨愁。
喧喧野縣自笙歌。風卷高雲天似波。誰謂樓前明月好。月明多處客愁多。

寫情二首

牆外誰家桃李開。何由花下一徘徊。先教飛絮傳愁去。卻遣游絲取蕊來。
人閒漏永報春暉。日過簷牙夢未回。隔夜雨飄梅蕊盡。入簾風捲柳花來。

題扇二首

越衫羅薄逆新涼。扇翦青綃秋水光。花前一把羅敷手。直到花殘襟袖香。

鬱鬱涼月帖淮天。露溼蒲梢風墮蓮。松蓋草茵迎不至。南山桂子老秋煙。
淮陰

蘆梢林葉雨蕭蕭。獨臥孤舟聽楚謠。生計飄然一搔首。西風沙上趁歸潮。
宿銅陵寺題壁

僧房秋夜月。明天下馬擁。裘人悄然。老僧何事亦晨起。清磬一聲驚客眠。
將之天長題新亭壁二首

新亭登眺解征鞍。飛鳥悠揚雲意間。誰謂塵埃無野興。故乘風雨看秋山。
雲捲山光到眼前。滿川搖落早秋天。客來繫馬成何事。風雨寒窗一覺眠。
過漣水

城頭落日在旗竿。城外長淮水浸天。左海門前燈火盡。鱗聲嘔軋夜深船。
春宮

團金袍袖繡長靴。寒食宸遊樂事奢。風擺珠簾紅幕潤。滿宮春雨落梨花。
效李商隱

深夜傳警報更籌。霜桂月華寒未收。昨夜雨昏今日朗。一番風雨一番愁。
楚城曉望

鼓角凌虛雉堞牢。晚天如鑑絕秋毫。山川搖落霜華重。風日晴明雁字高。
楚橋秋暮阻雨。
水滿城西釣艇橫。雲豪風弱晚冥冥。天寒小店人愁雨。燈暗孤舟客臥聽。



柯山集卷二十一

七言絕句

吹角

斷霞歸鳥隔山鍾。日過西山轉海空。長恨南城催曉急。五更吹角怨秋風。

登乘槎亭

海天秋霧暗乘槎。風響空山浪卷沙。杳杳鷗聲何處客。一帆衝雨暗天涯。

臘

荒秋野水閒荆榛。惟有青山日對門。草木向陰猶帶雪。風光近臘已如春。

題宅後井原注泉色正白。

清泉十丈白如漿。甘似醍醐透椀涼。君欲道中無渴死。百尋操練莫辭長。

和房日嚴換武詩

青衫厭著待封侯。慷慨知君定遠流。莫歎書生長齷齪。元戎曾與報更籌。

春

犍牛門外色初分。共喜斂頭彩勝新。花萼怯寒猶積雪。鳥聲催報已知春。

感春三首

日長殘雪滴高簷。院靜人間風度簾。可是歲華隨日好。故應愁恨逐春添。
冰消水面波光動。日暖樹梢花意歸。世上繁華易零落。卻應春淺勝芳菲。
梅梢柳眼弄春嬌。雲暖南山臘雪消。近郭樵漁成野市。遠村簫鼓隔溪橋。

荒園

荒園午日照青蕪。樹罅鳴鳩相應呼。一片陰雲送山雨。漸漸新麥地親鋤。

小雨

蕭蕭小雨不能收。一霎西風便似秋。枕席夜涼燈火暗。丁丁更漏隔南樓。

着花

風暖日高花氣動。鳴鳩乳燕自求羣。經營美景還詩匠。傾掃頑愁賴酒軍。

題唐宋輔城上小樓二首

沙田小雨不成泥。一帶溪光照翠微。遠目直隨殘日盡。晚雲還望故山歸。
近郊小徑絕人行。水滿菰蒲取次生。沙岸雨來長集燕。桑田深處忽聞鶯。

晚歸

學省歸來門巷秋。伴眠書史滿牀頭。低雲漠漠梧桐晚。屏上江山亦解愁。

秋

日落星稀河漢微。清秋一點水螢飛。涼風白露愁先覺。可待梧桐報卽知。

調全玉病二首

維摩丈室自蕭然。病起新涼得恣眠。我愧聲聞難問疾。想君獨對散花天。詩將收功久戢戈。羸師再鼓奈疲何。想君無物驚禪定。獨未能除是此魔。

女几山

不復當年端正樓。多情猶問故宮遊。山川不改繁華盡。須信人生一世浮。

昏昏

昏昏落日下牆東。歷歷晴雲送去鴻。歲晚蒼槐甘老大。盡將黃葉附秋風。

謝仲閔惠友于泉原注。泉上多紫竹。

地吉泉甘慶所鍾。直疑遙與惠山通。曲肱煩暑都消盡。如臥蕭蕭紫竹風。

貧病投劾乞補外官親友問者以詩答之

卑如揚子官執戟。貧似玉川居洛陽。不敢彎弓輕妄射。爭如覆被逐山郎。

楚王

十二巫山聳翠巒。楚王宮殿玉巉岏。定知爲雨爲雲處。不似當初夢裏看。

宋玉

雲雨朝朝峽裏興。可能無復夢中情。巫娥若問誰爲賦。敢乞君王道宋生。

項羽

沛公百萬保咸陽。自古柔仁伏暴強。慷慨悲歌君勿恨。拔山蓋世故應亡。

范增

君王不解據南陽。亞父徒誇計策長。畢竟亡秦安用楚。區區猶勸立懷王。

蕭何

蕭公俯仰繫安危。功業君王心獨知。猶道邵平能緩頰。君臣從古固多疑。

韓信

登壇一日冠羣雄。鐘室倉皇念劇通。能用能誅誰計策。嗟君終自愧蕭公。

賈誼

賈生未免孝文疑。自古功名歎數奇。遂得洛陽年少去。白頭絳灌亦何爲。

李廣

李廣才非衛霍儔。孝文能鑒不能收。君王未是忘征戰。何待高皇萬戶侯。

東方曼倩

軒冕功名何足爲。先生聊作易農賚。漢庭誅死皆卿相。猶說才能勝滑稽。

成帝

百華衣上漬餘香。夜照猶煩蚌有光。解道溫柔勝武帝。不知壯髮似元皇。

趙飛燕

苦心膏沐不論貧。富貴人生各有時。直使中流畏仙去。君王何啻似嬰兒。

朱雲

直言請劍斬安昌。勿謂朱游只素狂。君看漢家文景業。張侯能以一言亡。

孔光

鄉原世畫謂醜儒。漢室傾危孰與扶。試問不言溫室木。何如休望董賢車。

梁冀

力回漢鼎未收功。又道將軍世上雄。不悟折腰同齷齪。百般裝束爲秦宮。

殷浩

田野高風過有薰。廟堂經畫竟無聞。固應竹馬思元子。江左興亡不在君。

偶成

低雲著地曉悠悠。雨溼簾旌不上鉤。江北江南千萬里。年年長向此時愁。

傷春

浮雲冉冉送春華。怯見春寒日欲斜。一夜雨聲能幾許。曉來落盡一城花。

七月六日二首

月落暗蟲啼不休。五更白露曉悠悠。西風是處將搖落。可但梧桐獨報秋。積雨空階生綠衣。幽幽點點弄秋姿。黃昏樓角看新月。還是去年牛女時。

元忠學士八兄未離京師遠蒙追送許惠服丹法託故竟未惠及賦五絕句

身逐孤舟似斷雲。故人追送尙殷勤。秋城夜泊西風岸。落葉悲蟲獨自聞。衰柳苦催空壁月。悲蛩真弔短檠光。無情少壯拋人去。只有窮愁氣味長。欲盜羲和一點春。五更注想隔重雲。如何但欲獨不死。分我刀圭未費君。昔見將軍破虎驕。玉堂曾共掃千言。功名老去皆蹉跌。相見諄諄勸學仙。無復顛狂似少時。逢君猶自說蛾眉。玉堂舊事君休念。兩袖啼痕又送誰。

閒步

枝上啼鴉巢欲成。晴簷向日乳鳩鳴。可憐霜雪餘威盡。春草無名著處生。

寓楚題楊補之官舍

一辭蠟陸走天涯。客路悠悠老歲華。住久不知身是客。自來堂下採黃花。
傷春四首

曉雨催春不惜花。亂紅飄泊委泥沙。傷心憶得年時事。白髮風前只歎嗟。
紅杏牆頭最可憐。膩紅嬌粉兩娟娟。曉來併逐東風盡。容易分飛又一年。
嫩紫妖紅惜不得。亂隨風雨點蓬蒿。荒田野草花開晚。主管春風輸爾曹。
高樓春晝獨驚心。白日閒雲亦自陰。風雨催花花已盡。滿城新綠亂鳴禽。
三鄉道中遇雨

蕭蕭古道西風雨。慘慘黃昏匹馬行。未遇功名莫嗟歎。逢時更自憶平生。
題南禪院壁二首

乞食高僧午未歸。秋庭落葉日暉暉。蕭條古寺松陰下。簷鐸風中乳鶴飛。
秋林落葉已斑斑。秋日當庭尙掩關。掃榻晝眠聽鳥語。可憐身世此時間。

次韻王彥昭感秋三首

木落風高秋雁歸。初晴野水漲清伊。東流會向淮南去。憑寄秋來無限悲。
年來詩酒最關身。滿酌休論薄與醅。愁見洛陽秋夜月。無情偏照不眠人。
塵埃容易點吳衣。澤國秋來信息稀。想見淮南初木落。秋雲秋水雁初飛。

絕句三首

藹藹晴郊花氣浮。午窻晝睡擁鴛裘。覺來烏雀茅簷靜。屋角春風怒未休。
照水輕明楊柳芽。隔林相映占巢鴉。東風香草城邊路。到處人家盡是花。
淮上春風萬鼓聲。落帆舟泊岸邊磯。喧喧野市殘陽裏。沽酒攜魚客散歸。

雨後遊朱園

綠葉陰陰護翠枝。晚花雖小亦應稀。東風不惜殘桃李。吹作春愁處處飛。

酒病中寄李十二招飲二首

班郎握筆未封侯。嗜酒揚雄欲白頭。寂寞著書誰作伴。西枝風葉碧梧秋。
酒病岑岑更怯寒。一窻疎雨擁衾眠。西風一入庭前樹。便有秋聲到枕邊。

乍晴二首

洗來桐葉晚青青。積雨欄干暗菌生。牆角半傾苔暈合。蕭蕭風草一蛩鳴。
虹長飲雨川無滴。蘋末生風沼有波。一掃煙雲不知處。夜天如水瀉銀河。

雜題二首

寒雨蕭蕭桐葉驚。浪浪還作夜階聲。西風忽起幽人覺。枕簟涼時向五更。
蒼蒼落月井梧西。睡覺幽人自卷帷。只有林鶯知夢斷。曉庭人靜語移時。

徐園閒步二首

平田小雨潤新耕。曉日園林信腳行。襯步野蕪吹面柳。可憐春物總多情。
動地春風晚未休。吹花折柳卻成愁。塵埃不用煩車馬。獨臥氍毹正擁裘。

雜詩二首

縣城山下梅花樹。臘月江風好在無。爭似姑山尋綽約。四時長見雪肌膚。
病腹難禁七椀茶。小窗睡起日西斜。貧無隙地栽桃李。日日門前自買花。

絕句

伏暑新除風露清。五更山舍一雞鳴。幽人枕上朦朧睡。臥看東岡次第明。

赴官咸平蔡河阻水泊舟宛邱皇華亭下三首

怒河憑雨正奔流。踏踏卑梁滯去舟。淹泊我生應有定。不須歸怨一汗溝。
鼻鼻悲蟬古柳風。水邊幽草已鳴蛩。長河未放羲和宿。卻放斜陽更向東。
夜空如鑑碧新磨。倒影疏星亂素波。天色水光無別處。爲君垂手攬銀河。

春雨中偶成四首

廉纖小雨作春愁。吹溼長雲漫不收。架上醴醴渾著葉。眼明新見小花頭。
槐葉青青染不如。護巢鶉語有新雛。蕭蕭晚雨窻鳴急。臥穩蓑牀玉枕書。

天低芳草接浮雲。萬柳含煙翠不分。燕子歸時花徧落。暮寒和雨入黃昏。
春陰只與睡相宜。臥聽鳴禽語復飛。一縷斷香浮不散。何人深院晝熏衣。

春詞二首

殘紅新綠閒鞦韆。寒食園林人意閒。一陣春寒花上起。畫廊連夜雨珊珊。
鶯鶯芳園誰氏家。朱門橫鎖夕陽斜。鳩鳴鵲噪閒庭館。盡日春風吹百花。

遣興

百感摧傷強對春。看花花畔獨沾巾。祇應閉目林中坐。須學無言壁上人。

潮水二首

水滿清淮自在流。落花吹盡浪悠悠。總將春雨爲春淚。未比思君一半愁。
近來消息愈堪猜。飛鳥無情不肯迴。惟有清淮慰人意。春流日日自東來。

夏日池上三首

新蟬上樹空遺蛻。野雀哺雛爭小蟲。粉沾衣袖竹枝雨。香滿水亭荷葉風。
落日鳴蟬夏木荒。芙蓉半落柳成行。何人紈扇生新恨。亭館迎秋夜夜涼。
拒霜灼灼欲破紅。夜來雨落荒蘭叢。空亭無人日色午。但聽桐葉驚秋風。

秋日卽事三首

支離臥病不知秋。暑退初驚大火流。蟋蟀知時鳴近壁。銀河照夜直當樓。
蕭條歲晚搔雙鬢。流落天涯念舊遊。惟有醉來心暫展。無錢沽酒合長愁。
蕭蕭衰草傍牆生。中有寒蟲白日鳴。秋物荒涼禾稼熟。悠悠驅馬水邊行。

秋雨二首

南山雲起滿庭陰。簾幕初涼七月深。桃子壓枝桐葉老。連縣風雨作愁霖。
離披衰柳已無蟬。黃葉閉門風雨天。陶令無錢難得醉。竹窗過午枕書眠。

秋夜寄遠

秋晚蕭條風露清。星河耿耿漏丁丁。祇應新月頻相見。長向玉樓東畔生。

秋夜

微雲淡月夜朦朧。幽草蟲鳴樹影中。不待南城吹鼓角。桐聲長報五更風。

遠思

裊裊霜風吹碧梧。孤城殘角奏單于。山川浩蕩愁千里。樓閣黃昏月一梳。

柯山集卷二十二

七言絕句

懷竟陵蓮花

景湖門外有汀洲。灼灼紅蓮照碧流。公子不歸時節晚。兩枝風葉臥清秋。

懷陸羽井

寒泉背石老松根。禪室幽人古像存。長恨千年無屈宋。楚招難與此遺魂。

冬日懷竟陵管氏梅橋四首

旅居澤國小園林。千里相望歲暮心。想見竟陵殘雪裏。新梅點雪橘垂金。
小小園林點點梅。如今綽約為誰開。只應清夜新霜裏。依舊橫斜倒影來。
他日華陵跡已陳。嘉辰懷舊一銷魂。小園依舊誰相念。應有新梅覓故人。

亦云華陵。

原注。復州竟陵郡有五華山。故

堂下幽芳自可人。北風一為屏埃塵。上元簪珥玲瓏玉。卻曳青霞霜女裙。

厄臺寺三首

諸佛蒼然照殿楹。圓光明滿自然燈。千年遺事無人問。館後高眠久屬僧。
峨帽前約已成空。風雨蕭蕭送暮鐘。何用忘饑來問話。不如松下謁癡龍。
世味嗟予淡莫加。更將詩句寄烟霞。自憐落筆無好字。不及揚州王謝家。

過蘄澤

雄吞六國弱秦強。壯士逡巡野水傍。耕叟不知鴻鵠志。笑觀宮室忤陳王。

崇化寺三首

樓殿沉沉鎖夜烟。秋燈一點佛龕前。梧桐葉上三更雨。亦有愁人獨自眠。
白髮荊州嘆滯淫。吳衣重杵巡城砧。遣愁莫上高樓望。只有愁來晝日陰。
零落宮牆官樹秋。行人東去路悠悠。祇應樓下邯鄲路。亦有離人對此愁。

偶成

漫學文章弊性靈。屠龍藝就誤平生。翩翩仕路新冠蓋。何用揚雄強作經。

贈趙簿景平二首

明道新墳草已春。遺風猶得見門人。定知魯國衣冠異。盡戴林宗折角巾。
紛紛俗物久堪憎。愛子蕭蕭眉宇清。莫嘆青衫掩事業。白頭卿相死無名。

自遣四首

是非得失一區區。蚊蚋啾啾共一壺。不學退之求羽翼。惟憑一夢到華胥。
誰云造化本無情。利害乘除理甚平。莫逐衆情生愠喜。君看三四孰虧盈。
誰云至理宗無相。大道由來萬法兼。且以聲音爲佛事。曉敲清磬誦華嚴。
浮世榮枯理易觀。不勞重取朽龜鑽。直應桃李繁華日。便把荆榛寂寞看。

立秋二首

西風嫋嫋木颼颼。身在江湖北岸州。自古楚人詞最好。爲君重賦竟陵秋。
對酒聊同楚人醉。哦詩惟聽越吟聲。洞庭北岸孤城下。落月西風聽曉鶯。

晚步靈壽寺後二首

秋城草樹欲黃昏。微逕新晴菜甲新。便好灌園從老圃。此懷原是漢陰人。
逢秋種菊尙殷勤。隙地侵尋欲過鄰。便好採花供服餌。形容已似澤邊人。

感秋三絕

秋思鄉愁兩苦辛。更臨西北望秋雲。此生更老情終在。誰爲寄聲千里人。
楚天未白轉星河。樓角先吹出塞歌。長愧侵床五更月。殷勤無計謝姮娥。
高林敗葉已颼颼。更有寒莎翠已收。若道神仙脫情累。如何獨唱感庭秋。

局中聽雨

秋庭聽雨斷人聲。涼入衣裾秋意生。臨水登山送歸語。憐君解有許多情。

夜思

萬聲沉寂漏丁東。金井闌干上暗空。半夜西風人未覺。秋聲先報草根蟲。

晨起二首

楚鄉秋早倦炎蒸。長恨梧桐不可憑。爽氣忽隨風雨至。曉堂無寐獨神驚。中宵爽氣入衾裯。簷雨浪浪曉未收。三伏炎歊掃除盡。待教明月放清秋。

近中秋

姮娥藥熟桂華新。滿貯清光待出雲。徐御冰輪行碧落。世間多少感秋人。

章華

長恨章華亦陋夫。周秦僅可勝登徒。誰知南楚仍窮巷。骨像何妨自應圖。

秋晚

日轉秋庭樹影斜。風來粉蝶勝悲笳。祇應宋玉秋來夢。常在牆東阿子家。

遷居對雨有感

楚鄉風物淡悠悠。獨掩閒門客滯留。盡日無言對秋雨。相敲蕉葉各吟秋。

竟陵儼舍仍有小園景物頗佳

荒涼臺閣追隨事。懶慢江河放逐臣。應是主人憐寂寞。僦居仍有小園春。

題西園醮醮

風霜老枿蹙龍蛇。中有青春白玉葩。要使根深生意遂。不妨秋雨臥泥沙。

西軒

出架薔薇秀晚枝。雨餘屋角理蛛絲。可憐一曲秋風地。萬思千情鬪入詩。

九月十日菊花爛開

蕭條秋圃風飛葉。卻有黃花照眼明。已過重陽慵采擷。自嫌亦作世人情。

讀除目有感

禍福茫茫不可猜。可能憑勢即無災。相君西闕揮毫日。豈料方還此地來。

效吳融詠情

依依漠漠復紛紛。觸處相隨過曉昏。知是妄緣除不盡。更教風月助吟魂。

竟陵酒官舍北有數步草。歲寒霜落猶鬱然也。予爲障其風。霜暮冬尙自如。一日大火焚舍無遺。

復往尋草不復有矣

爲愛墻隅芳草色。故遮霜霰待新春。火燒雨洗尋無處。祇有東風吹舊塵。

臘日步西園

三畝寒園春欲回。淺池低樹忽飄梅。楚鄉萬里霜雲盡。歸雁行行斜日來。

夏日七首

兩架醲醑側覆簷。夏條交映漸多添。春歸花落君無恨。一架清陰恰滿簾。
野水彎環夏木森。清蟬晚噪碧雲深。扁舟兩槳誰家子。萬里江湖此日心。
蘄簟紗廚與夏宜。法曹腰腹大何爲。重雲到地翻盆雨。卻是幽人穩睡時。
千蛙鳴噪汙池水。萬螿奔馳一腐蟲。得喪世閒能幾許。冥冥高處有飛鴻。
涼風一掃宿雲輕。隱隱收雷不復驚。試決小池疏積潦。誰教蛙吻頓無聲。
風轉翻翻梧葉驚。入簷白雨打窗鳴。應將清絕酬無睡。穩聽空階半夜聲。
女兒山前官舍清。邊堂鳴澗夜泠泠。塵埃別後何由見。簷雨三更起坐聽。

晝臥口占三首

康濟朝饑進湯餅。誰何午睡屬新茶。讀書隱几聊侈爾。謝客扃門豈不佳。
甘風遠集聞朝嘒。怨月深栖有夜鳴。涼牖疏明稀老翠。雨畦幽獨立新青。
學道窮年要有得。強顏于世欲何求。病栽薏苡無勞謗。溼要鞠藭不待搜。

贈无咎

欺馬街泥未肯乾。重城含霧曉漫漫。誰令萬屋淋漓雪。猶作長安半夜寒。

晚春四首

楊柳藏鴉筍作竿。曉風吹雨作輕寒。清陰一片收春去。留得薔薇數點殷。
薔薇倒架筍過鄰。夢澤茫茫欲晚春。綠暗紅稀君莫嘆。滿枝梅杏欲嘗新。
洗雨吹風欲晚春。盡收紅紫布青雲。眼前消長諳已久。清坐不妨長閉門。
荒畦零亂滿蕪菁。春事收功欲老成。鶻噪鳩鳴莫無賴。曉枝千轉有鶉鶯。

懷金陵三首

此君堂後青蒼玉。別後何曾寄一聲。想見秦淮月堂下。西風吹浪拍隄平。
璧月瓊枝不復論。秦淮半已掠荒榛。清溪天水相澄映。便是臨春閣上魂。
曾作金陵爛漫遊。北歸塵土變衣裘。芰荷聲裏孤舟雨。臥入江南第一州。

水閣二首

積雨荒池水欲平。軒窗長夏有餘清。公餘一枕滄浪夢。臥聽風荷受雨聲。
池水亭亭如有光。曉風清露點新粧。翠帷白障非遊女。多謝經營白鷺郎。

出京寄无咎二首

不許多聞長樂鐘。打包且遇又匆匆。長安城裏誰相識。只有周南太史公。
老去相看情益親。河梁分手欲沾巾。祇應誦得離騷賦。長作行吟去國人。

讀史二首

區區姦智終何補。不悟身猶弄伎兒。蛇斷楚郊秦未覺。鬼謀曹社夢先知。嬴秦餘祚已蛇分。車府凶高尙畏人。安有區區猶指鹿。從來菽麥不曾分。

韓信祠有序

史稱信之族誅。予嘗疑之。其謂陳豨曰。三至上必自將。予從中起。夫使高帝將精兵于外。而信欲詐驅徒奴烏合之衆于京師。雖太公穰苴不能以成事。此猶魚然于猛虎之穴。虎歸則無事矣。信謀無遺策。豈肯爲計若是之疏哉。况蕭相國在長安。信獨不界之耶。此殆以高帝出征。以信失職。界其亂于內。亦若彭越使人告之。而傳致其詞如此耳。不然。信不忘漂母一飯之恩。信遇高帝恩亦厚矣。一旦背之。豈人情哉。

千金一飯恩猶報。南面稱孤豈遽忘。何待陳侯乃中起。不思蕭相在咸陽。

題淮陰侯廟有序

呂太后勸高祖誅彭越。使舍人告其反。而越固未嘗反也。特以爲名耳。高祖將兵居外。而太后在長安。太子仁弱不知兵。而韓信方失職在京師。呂畏其乘時爲亂而不可制。使人誣告其反。詐召而誅之耳。方是時。蕭相國居中。而信欲以烏合不教之兵。欲從中起。以圖帝業。使雖甚愚。必知其無成。以信之雄才。謀無遺策。肯出此哉。太史公記陳豨反事。言豨居代。多致賓客。周昌

畏其不軌而奏召之不至。豨因自疑，而其後通曼邱臣王黃，遂反。此司馬遷所謂邪人進說，遂陷不義者也。遷載豨反事，未嘗一言及信。吁！此遷欲見誅信之冤也。

雲夢何須僞出遊，遭讒猶得故鄉侯。平生蕭相真知己，何事還同女子謀。原注：何不爲信辨其枉也。

偃王城

逃戰彭城似去邪，興王可卽廢爲臣。中原多少堪憂事，勞苦君王八馬奔。

挂劍臺

上國歸來歲月深，悲嗟脫劍挂高林。欲知不負徐君意，便是當年讓國心。

古意

樓上珠簾拂疏網，卻勻愁黛對凌波。也知新舊爭多少，敢話機頭織素多。

道彭澤

姓陶令尹今何在，空補陳編歸去來。安得春江作春酒，百年長與子銜杯。

柳

永豐坊裏舊腰支，曾見青青初種時。看盡道邊離別恨，爭教風絮不狂飛。

題宣州後堂壁四首

過雨山亭暑氣微，老人猶未試生衣。滿園閒綠無人到，春日南風燕子飛。

我欲留春情不淺。青春別我苦無情。敬亭山下紅千樹。日日南風綠滿城。
翠樹陰陰晚雨回。江山清潤絕纖埃。軍廚煮酒香初熟。更釣溪魚斫鱸來。
流落天涯一病身。簿書叢裏費精神。殷勤照水窺華髮。黃鳥聲中又一春。

宋景平命賦隔牕花影

午睡簾櫳春日長。半消金鴨水沉香。隔牕花影時來去。疑有東鄰覘宋郎。

晚春初夏八日


陰陰夏景變餘春。清曉園林未有塵。日日東風欺弱柳。鵝黃吹盡作青雲。
少室山前日日風。望嵩樓下水溶溶。卷將春色歸何處。盡在車前榆莢中。
吹盡成蹊桃李塵。免葵燕麥一番新。只應解籜抽青玉。霜節稜稜尙可人。
古柳參天鳴啄木。青蕪覆地不鳴鳩。白頭懶作留春計。睡起移時獨倚樓。
睡足高簷春日斜。碾聲初破小龍茶。樓邊綠樹飛紅盡。春色牆陰老薺花。
青春已屬明年事。晝滿初知夏景長。日日南風筍成竹。殘紅雖有不成妝。
春歸草木漫青紅。半委塵埃半逐風。誰似長楸百餘尺。高張錦繡照青空。
餘醞壓架不勝繁。洗雨吹風更可憐。姑射仙人本仙骨。百花凋盡獨嬋娟。

梅花十首

月落嚴霜自理妝。北風工爲發清香。曉英數點辭人去。幽獨無人爲斷腸。
幽恨清愁幾萬端。故將巧笑破霜寒。落英收拾供騷客。秋菊從來不足餐。
姑射仙姿不畏寒。謝家風格鄙鉛丹。誰知檀萼香鬢裏。已有調羹一點酸。
林外啼禽自往還。風前詩客倚闌干。小園門鎖黃昏月。耿耿幽姿伴歲寒。
玉粟勻圓官樣黃。領巾借與十分香。衝寒不爲生春物。自要晨霜爲洗妝。
清寒池館靜無塵。歲歲相逢似故人。任遣牆頭疑是雪。欲教園木早知春。
脉脉無言亦有期。雪中狂殺羽林兒。可憐多少幽奇事。卻是東風總不知。
任教雪壓色終勝。卻要風嚴香更聞。江雨細時青子熟。聞名猶救渴將軍。
數點深藏碧玉枝。翠峰十二擁瑤姬。憑君說與凡桃李。徹骨清寒爭解肥。
三畝荒園草棘荒。可堪終夜北風狂。瑤環瑜珥誰將去。嘖嘖幽禽啄蕊黃。

絕句二首

萱草開時燕引雛。石盆雨滿長菖蒲。但令甕有賢人酒。何用門迎長者車。
門前山樹插雲青。雨足山前稻水平。桑柘半空蠶事了。綠陰深處囀殘鶯。



柯山集卷二十三

七言絕句

臨淮道中

凜凜春寒犯客裘。輕陰殘雪放孤舟。無端惟有堤邊柳。作態東風惱客愁。

許同塵示張八侍郎避暑覽館中舊題絕句俾之同作次韻

聚散人生集渚鴻。飛鳴邂逅一宵同。是非榮辱何勞問。共在邯鄲一枕中。

西園風雨雜花謝

楚澤春殘雨又風。啼鶯芳草思無窮。蕪菁滿地黃金爛。不及薔薇一點紅。

慈湖中流遇大風舟危甚食時風止遊靈巖寺

心悸西江浪似山。眼明僧舍一窗閒。從今要見廬山面。畫作屏風靜處看。

寓淮陽驛二首

一庭秋色高堂夜。半壁燈光短幌涼。都是去年秋氣味。誰知飄泊古淮陽。

悠颺短日下西墻。庭葉吟風作夕涼。客枕甚安無一事。鄰雞不用喚朝陽。

觀魚亭呈陳公度二首

千古濠梁莊惠詞。不須反覆辨真知。直應人意逍遙處。便是游魚自樂時。獵獵微風波面開。近人鷗鷺不相猜。樽前忽起扁舟興。新管江南山水來。

寒食離白沙

莫驚客路已經年。尚有青春一半妍。試上芳堤望春野。萬絲楊柳拂青天。

紹聖甲戌侍立集英殿臨軒試舉人作此兩絕

春來小殿雪初殘。曉日曛曛未破寒。黃繖當軒公事退。君王緩步侍臣闌。弱歲干名翰墨場。春寒搖筆試西廂。茫然二十年閒事。還著春衣侍玉皇。

同仲達雪後躡小山遊蔡氏園得紅梅數枝奇絕因賦二首

與君陟巖踏春泥。邂逅紅梅得一枝。失卻孤山風露格。恰成卯酒醉冰肌。原注：李正封牡丹詩：有國色朝
酹酒之句。

北風凜凜留高樹。融雪涓涓聚小塘。三畝山園半春草。無人爲結小丁香。

戲呈希古

半世辛勤守黃卷。白頭容易過青春。枕前亦覺春晴否。試問東鄰晚起人。

賞心亭

楫迎桃葉家何處。漿送莫愁人已非。獨立東風今古恨。春江無語又斜暉。

題洛尾亭二首原注。入汴第一亭。

日出南山春霧收。渾渾洛尾入淮流。莫向行人贈楊柳。折將離恨入孤舟。
洛尾亭邊淮汴交。來波去浪恨迢迢。無端更洒黃昏雨。吹作春愁不肯消。

題周文翰郭熙山水二首

魚村橋市楚江邊。人外秋原雨外川。遣騎竹邊邀短艇。天涯暮色已蒼然。
洞庭葉落萬波秋。說與南人亦自愁。指點吳江何處是。一行鴻雁海山頭。

立春三首

天上春來誰報人。江山氣象一時新。懶將白首簪幡勝。壽酒三杯慰逐臣。
風光先著竹閒梅。和氣應從九地回。桃李滿園渾未見。微紅先向寶刀開。
蒼龍闕角回金斗。文德門南散曉班。車馬紛紛殘雪裏。鏤銀剪綵舞新幡。

寒食

庭院輕寒新雨過。江城寒食野花飛。故園北望一千里。極目江楓客未歸。
竟陵夢野亭在子城西南角。一目而盡雲夢之野。最爲郡中之勝。
高薨巨桷壓城闔。平視如將七澤吞。幾度春光招宋玉。碧闌干外獨消魂。

奉符縣北二十里林家莊馬鋪壁閒有草書數行半毀矣問其人云熙寧中錢提刑所書予考其

時蓋翰林四丈穆父也錢公謫秋浦而卒其子已免喪矣覽之不覺失涕因留一絕

龍蛇半滅亭閒字。泉壤長埋地下身。從此世間無玉樹。故人三嘆淚沾巾。

木芙蓉菊花盛開

空山岑寂何所有。晚菊芙蓉相對幽。伴我悠悠過閒日。憐渠灼灼媚窮秋。

夜間風雨有感

留滯招提未是歸。臥聞秋雨響疏籬。何當粗息飄萍恨。卻誦僧窗聽雨詩。

次韻智叔三首

才似庖刀不待礪。思如流水更清冷。詩壇李杜誰爲將。盡掃樓槍正國刑。
公子風流更可人。仙家問訊柳湖春。煩公盞下一杯酒。洗我胸中百斛塵。
今朝一見詩人詩。不用更尋黃絹詞。深山一鶴自唱晚。亦有松下童子知。

絕句

竟陵秋色清如水。客舍飄梧墜晚階。已掩重門風葉定。玉鉤還向玉人來。

西園

滿園紅紫春無限。盡日飛鳴鳥自由。夜雨朝晴風日好。盡舒雲錦不能收。

晚春

苔封池面草芊絳。鳴蚓跳蛙意若便。頗覺風雲有奇變。翻盆一雨便潺湲。

殘春二絕

低簷送雨晚霏微。溼透梅房白漸肥。半捲畫簾屏扇掩。朦朧春睡擁春衣。
攔干倚徧更消魂。春到淮南得幾分。裊裊柳枝烟雨溼。畫樓殘角送黃昏。
強尋春物散無聊。直使樓高恨未消。鱗碧萬家看不盡。杏花時見隔牆梢。

偶題二首

相逢記得畫橋頭。花似精神柳似柔。莫謂無情卽無語。春風傳意水傳愁。
春水長流鳥自飛。偶然相值不相知。請君試採中塘藕。若道心空卻有絲。

宛邱道中

日斜沙路馬翩翩。故欲迎涼不著鞭。誰解多情似新月。伴人歸去照人眠。

青桐道中值雨凡數里舟行久之頗有江湖之思二首

繫馬操舟問櫂師。卻疑淮口掛帆時。人間遷改何須問。便作江湖未可知。
冥冥烟外鳥飛歸。野老得魚收網迴。隔浦斷霞沉欲盡。半彎新月出雲來。

宿咸平驛

蕭蕭暗葉鳴秋雨。淅淅窗風戰客燈。世味飽諳心已老。不煩潘鬢強侵陵。

蕭蕭

蕭蕭風雨五更初。枕上秋聲獨井梧。只有菊花猶灼灼。苦教摧拉就荒蕪。

淮陰道中

映日斷霞臨水盡。出雲新月向人來。野塘秋晚無行迹。點點黃花照水開。

夜坐

庭戶無人秋月明。夜霜欲落氣先清。梧桐真不甘衰謝。數葉迎風尙有聲。

試筆

學館蠶鹽驚歲晚。寒窗書史伴身閒。年來轆軻甘言命。老去追隨厭強顏。

新春

水鄉清冷落梅風。正月雪消春信通。昨夜園林新得雨。杏梢爭放曉來紅。

野步

帶水依城一逕微。出城桃杏雨來枝。最憐楊柳身無力。付與春風自在吹。

春日偶題四首

漫漫東風百草長。天桃如笑柳如粧。惟憑酒作青春敵。收拾風光入醉鄉。

隔屋桃花暖鬪粧。好風時有過牆香。滿園芳草無人種。何事春來特地長。
舍北小桃纔及肩。可憐枝弱苦花繁。黃昏雨急東風惡。惜爾不禁春夜寒。
白首傷春一老翁。預愁寒風過春中。下簾數點黃昏雨。一霎輕寒青杏風。

偶成二首

新引龍孫欲解苞。籬根抽筍已梢梢。莓苔雨過蝸緣壁。楊柳葉深鶯有巢。
乍晴幽步踏斜陽。殘潦青苔曲徑荒。風擲落花填小壑。雨催芳草上空牆。

題軫師房二首

漠漠雨苔依砌綠。鮮鮮秋菊映階黃。山僧睡起日亭午。出戶微微柏子香。
銅瓶布衲出塵埃。疏瘦風標日一齋。門逕蕭然更無事。生螢飛鶴及時來。

初離山陽迴寄城中友人二首

落日昏昏向水低。五更殘燭一聲雞。祇應魂夢猶東去。從此扁舟日向西。
野岸蕭蕭落葉風。秋光離思兩相攻。殷勤臨水揮雙淚。憑寄清流卻向東。

淮陰晚望

蕭蕭衰柳來時路。裊裊危檣西去船。白鳥歸飛夕陽盡。斷霞風約過平川。

宿第四鋪

繫纜寒沙傷客情。秋雲不動夜陰生。蕭蕭兩岸黃榆葉。解報三更雨到聲。

初見嵩山

年來鞍馬困塵埃。賴有青山豁我懷。日暮北風吹雨去。數峰清瘦出雲來。

有感

鬢毛已自秋來變。脾肉仍于馬上消。滿眼青山不歸去。強顏微祿亦何聊。

福昌官舍後絕句十首

淮南梅柳想春還。怯見西州歲暮寒。惟有看山心未厭。晴明終日在闌干。
小園寒盡雪成泥。堂角方池水接溪。夢覺隔窻殘月盡。五更春鳥滿山啼。
無客門闌盡日扃。兩行喬木擁寒廳。吏胥借問官何在。流水聲中看竹行。
漫與東風作主人。栽培花草伴閒身。不辭伐竹成高架。收拾薔薇一片春。
臥聽堂南布穀鳴。隴頭細麥已青盈。殷勤謝汝催春種。我爲無田豈懶耕。
翠竹留人不忍還。暖泉春漲已潺潺。寄言山鳥休歸去。與爾同來樂此間。
洛川春色幾時歸。漾漾清流點翠微。日暖雪消沙岸軟。鴛鴦相對不驚飛。
風吹春日下南山。尚有輕冰結暮灘。何事鴛鴦故相守。清溪不怕夜栖寒。
不掃竹根藏筍苗。旋培殘雪擁蘭芽。爲君更接櫻桃樹。付與春風換卻花。

清明山色到前簷。汨汨溪流聚小潭。一榻竹窗晴晝睡。依依春夢入江南。
夢周楚望

春風吹夢到淮南。一夕從容盡笑談。睡覺始知經歲別。洛陽新柳已毵毵。
絕句

坐局歸來已暮鐘。濛濛寒雨溼裘茸。正須牆下一壺酒。不怕江頭三日風。
有感

屋角纖纖挂斷虹。清蟬一噪起高桐。天涯雲盡見殘日。林下雨餘來好風。

贈鐵牌道者

微官待旦亦朝天。賴爾絕勝鐘鼓傳。舉世昏昏竟難警。憐君常負五更眠。

讀吳怡詩卷二首

羅田春動雪消初。主簿清詩雪不如。休學風騷窮事業。花前莫負古銅壺。
疏梅半落雪中香。想子孤吟對酒缸。野水荒山半猿鳥。跨驢誰問賈長江。

題趙竇所收趙令穰大年烟林二絕

江上孤烟蔽遠林。秋原人靜下鳴禽。水鄉此景常經眼。誰信侯家畫萬金。
楓林荻港白晝靜。落雁飛鷗盡日間。平遠起君千里恨。清詩可要助江山。

屈原

楚國茫茫盡醉人。獨醒惟有一靈均。舖糟更遣從流俗。漁父由來亦不仁。

觀音泉

巖松偃蓋不知年。寂寂秋燈寶供前。清徹一源傳萬古。空山長伴白衣仙。

宿慈氏院

樓上鳴鐘報五更。朦朧深殿佛燈明。更無幽夢隨寒枕。聽徹風松到曉聲。

巫臣二首

萬古風情不易禁。多言未似不言深。楚王只聽巫臣諫。不道逃吳已有心。咫尺山河不易知。無言莫謂卽無思。人間只見枝頭繭。不悟春蠶暗理絲。

北風

北風捲地寒侵骨。凍雪連山鳥不飛。試問朱門餘酒肉。幾人回首念無衣。

洛岸春行二首

溪上映人楊柳黃。滿溪流水碧泱泱。憑君莫向溪南望。春草春風能斷腸。南山晴翠入波光。一派溪聲繞郭長。最愛早春沙岸裏。暖風輕浪拍鴛鴦。

漫成七首

應敵詩才慚古人。牽情春色空閒身。鋪排物色雖甘拙。消散閒愁亦有神。
修竹娟娟一萬竿。清渠引水正潺潺。知時燕子來相語。任意鳧雛去不還。
高槐無花亦有陰。參天老枝逾十尋。流鶯不使人窺見。故隔深條送好音。
風吹桃花西復東。雨打海棠零亂紅。可是春光卽消歇。牡丹音信未全通。
江南梅花凌雪霜。桃李開盡春無光。誰知洛陽三月暮。千金一朵賣姚黃。
溪水春來清蕩沙。溪南溪北是人家。依依陌上多情柳。簇簇原頭自在花。
庭陰當午起猶慵。斷送殘春醉夢中。桑柘成陰桃李盡。一川零亂柳花風。

和應之出城

路穿槐柳遶山斜。長夏村墟對物華。青玉一尋披籜竹。絳繒千斤剪榴花。

永寧赴晁應之見招賞花途中遇雨

行雲濃淡日無輝。輕雨飄飄點客衣。馬上漫郎醒復醉。一盃容易送春歸。

依韻和晁十七落花二首

投老殷勤向物華。風前猶欲拾餘花。更將夢逐殘紅去。遍入長安百萬家。
飛隨風雨落隨流。更有餘紅亦已休。杳杳天涯春物盡。可憐鶯蝶不知愁。

和端午

競渡深悲千載冤。忠魂一去詎能還。國亡身殞今何有。只有離騷在世間。

偶成

須知庖手有真如。合遣輸人笑讀書。擁褐蒲團深閉目。老人于此有工夫。

雙廟

成敗功名付偶然。男兒要是死生間。故應城破知肝膽。飛矢何勞記賀蘭。

株林

九寡奔亡一老姬。白頭蠻叟嬖西施。二公費盡平生事。深屋嬋娟世得知。

淮上阻風步入寶積山訪軫長老

少年飄泊歸淮東。道人住庵何處峯。知有招提烟水外。雪雲山路倒杉松。

淮上觀冰下

寒淮千里羣冰下。古岸枯槎黃葦枝。憶得天津橋下見。五門春動雪消時。

柯山集卷二十四

七言絕句

春陰

驚鴻瞥過不容攀。病眼淮邊楚望寒。獨臥孤舟對楊柳。春風終日在橋竿。

宮人斜

青蛾皓齒作埃塵。玉匣珠衾地下身。一曲壞牆門不鎖。林花開落墓前春。

奉先寺

定知生不出長門。禾黍蕭蕭寺後村。松柏城南萬邱冢。傷心最說內人園。

至後早赴館二首

紅蠟糝梅冷未黏。柳條偷暖作纖纖。高樓殘白誰家雪。盡日天寒不捲簾。
城圍殘雪寒催曉。宮近晴雲暖欲春。誰覺風光添一線。玉壺漏水報雞人。

晁二家有海棠去歲花開晁二呼杜卿家小娃歌舞花下痛飲今春花開復欲招客而杜已出守

戲以詩調之

頗疑蜂蝶過鄰家。知是東牆去歲花。駿馬無因迎小妾。鷓夷何用強隨車。

復答迎郭侯犢車之句

玉壺春酒射朝霞。只看纖腰不看花。但遣舟迎桃葉女。仍須恩賜短轅車。

清明日舟中書事二首

清明不到旅人家。乞火鄰船自試茶。弄柳好風低作舞。夾船春浪細浮花。巢鳥噪處綠楊村。寒食人家晝掩門。麥隴曉風收宿潤。烟林午日漲春昏。

題海州懷仁令藏春亭

聞道山中賢長官。種花不肯放春還。故知車馬紅塵地。催促東風不得閒。

題綠野亭

渺渺孤亭滄海東。天連平野四無窮。可須戶牖毫端上。自攬山河眼界中。

漫成三首

驅除牢愁須酒聖。狼藉春色要花紅。定知春來無一事。苦教有情愁得儂。容易得愁卽不去。苦教春物喚愁生。遣愁飲酒大拙計。遣誰蹙眉爲慢聲。閉門春風作往還。誰家有花堪醉眠。柳腰榆莢爭入眼。江梅一枝遠如天。

題榮子邕陋居二首

草舍隆中一幅巾。閉門三致漢將軍。紛紛自獻知何有。終遣斯人了鼎分。
一室荒蕪孺子貧。知君四海入經綸。殺身虎口終何補。洒掃庭除自可人。

秋日有作寓直散騎舍

黃省文書分道山。靜傳鐘鼓建章閒。天邊玉樹西風起。知有清秋到世間。

曉雨

綠滿園林紅已稀。溼煙和柳共霏微。誰家油壁春寒裏。獨輶天街曉雨歸。

送周六赴濠州戶曹二首

老顛有婦何妨道。一室蕭然尙愧君。但恐小喬來丈室。卻須射虎作將軍。
從來悟道不由書。覲面相呈已有餘。塵尾花飛終不近。濠梁古鬼解挪榆。

趙弟

男兒何用立奇勳。趙弟從軍初不聞。但斬郁城侯萬戶。不須猿臂老將軍。

贊皇公

才高一世有奇功。掩卷令人獨想風。莫笑狄祠遷武相。致人從古是英雄。

夜來

夜來風雨掠餘春。晏起蕭條一病身。三月長安泥浩浩。懶隨車馬作游人。

桓溫

北征談笑縛姚公。靜掃諸陵見洛嵩。不用登高笑夷甫。正緣此輩使君雄。

和天啟惠橘詩

十年不摘洞庭霜。喜見新苞照眼黃。但對典刑休嗜味。原注天啟辭以橘酸。虎賁猶得作中郎。

題畫二首

敗蘆浸水凍灘沙。朔雪隨風亂綴花。溼翅老鴻鳴未起。暮雲山色暗天涯。
蒼蒼老石守寒叢。雪洒林鳩美睡中。鶉傍陳根饑更啄。雀栖高枿暝辭風。

題庭木

枯條怪石坐寒禽。玉軸高懸畫萬金。歲晚荒畦真在眼。寂寥方見此時心。

有所歎

駢脅當車闐戟先。相君冠蓋照秦川。六雄未滅君無苦。當念杜門公子虔。

五更

歲事先教蟋蟀催。暮雲樓闕殷輕雷。五更庭葉驚殘夢。知有清秋犯雨來。

下直

留住長安鬢已絲。宮廊還見落槐飛。暮雲疏雨蒼龍闕。不惜障泥策馬歸。

題史院直舍魚鷺屏

鐘鼓聲稀下直遲。秋暉初轉萬年枝。寒廳盡日誰相對。慙愧屏風畫鷺鷺。

梅花二首

便使柳肥終解舞。莫驚梅瘦爲含酸。因風自裊還成態。與雪爭妍卻要寒。天質自清非爲瘦。仙姿正白不施紅。未開如怨開如笑。枉乞幽香與北風。

探春

啾啾凍草羣飛雀。裊裊高林獨嘯猿。忽憶淮南春意動。早梅池館斷鴻天。

雙槐

老去相看終慘澹。秋來無賴對婆娑。任從葉逐西風去。要聽庭寬夜雨多。

晏起

晚起翻書日欲西。偶然乘興忘遨嬉。好書自癖非求利。掘冢才須數句詩。

和人二首

臘殘春近獨消魂。殘雪長安千萬門。青鳥何曾寄音信。碧雲剛解報黃昏。瞳矐曉日漏春光。欄下萱叢尙臥霜。認得君家門上雪。易知何事卻難忘。

天窻

鑿屋分將一尺明。坐令隔幌見簾屏。任從世界傾盆雨。只要蕭蕭數點聲。

失性

失性摧頽君子鶴。忘羞跳擲沐猴冠。須知六合梟鸞雜。供與閒人靜處看。

夢至一園池藕花盛開水鳥飛鳴爲作二小詩記之

偶來乘興不須疑。一頃秋香欲發時。老子婆娑真爲爾。百回相見愧鷓鴣。
平池秋水雨來深。無數紅妝出岸陰。翠幕深藏知有意。白鷗相見本無心。

讀王荊公詩

名實由來不可逃。悠悠毀譽亦徒勞。臧公已死言終立。不是軒裳世祿高。

雨霽

豐隆故犯青冥上。列缺應逢返照迴。樓外細蟾呈窈窕。枝閒少女故徘徊。

蹇驢

驥伏鹽車餓不行。疲牛與爾飽平生。子荆自是佳公子。亦向人前作汝聲。

局中晚坐

高林晚葉漸疏明。雨過長安萬屋青。爲問西風來幾日。夕陽宮殿亦秋聲。

無題二首

風槐已疏。遽如許。夜蛩雖怨。可若何。出門屐齒苔痕滿。隱几書塵鼠跡多。
晚起清秋。一枕涼。四簷鳴雨。下淋浪。竹籠燒藥時添火。書榻焚香卻閉房。

鶉鴉

整刷衣裾紫翠新。曉天風露壓雞晨。應知不置蓮花漏。長喚林中宴坐人。

久雨

欹簷積雨苔生瓦。陋巷人稀泥及門。坡下牛羊來遠墅。舍旁麻糝接荒村。

吳江道中懷陸魯望

我亦扁舟一散人。江湖爲洗十年塵。筆牀茶竈經過地。風月相望亦有神。

霽溪道至四安鎮

茗霽清秋水底天。夜帆燈火客高眠。江東可但鱸魚美。一看溪山直萬錢。

喜雪走筆呈李宣城三首

殷勤寄語宣城宰。公事何時是了時。病守欣然有嘉思。亦須對雪把空卮。
聒聒庭中爭曲直。紛紛筆下判鞭笞。坐曹決事輪歸飲。須信薛宣稱吏師。
萬夫餓腹待倉儲。三戶窮民守破圩。疲瘵不禁鞭撻甚。長官對酒且歡娛。

遊園

病來久不上層臺。窗有蛛絲逕有苔。爲報園花莫惆悵。故教太守及春來。

聞葢二首

晚風庭竹已秋聲。初聽空階葢夜鳴。流落天涯聊自得。今宵爲爾感平生。
二年江海轉萍踪。白髮蒼顏換舊容。新月窺簷風動竹。宣城今夜又聞葢。

雨中題壁

去年此日泊瓜洲。衰柳蕭蕭繫客舟。白髮天涯歎流落。今年對雨古宣州。

鷓鴣

敗荷枯葦一方池。溪上鷓鴣坐得知。何事月寒風露下。攣拳孤影在風枝。

秋蚊

江城落木已窮秋。病客初寒欲叢裘。暗室飛蚊猶撲面。不知天上火西流。

冬日

忽忽新冬無一句。自憐憔悴楚江濱。滿前魍魅何曾禦。尙愧無功作逐臣。

預作冬至

紫壇曾從奠琳琅。親被天人玉冕光。今日黃州山下寺。五更聞鴈滿林霜。

原注：某元祐七年南郊。曾與捧
皇帝。顧帛席左。見上冕玉簪白如雪。爲燭所照。出光數尺云。

九日登高

黃梨丹柿已催寒。一月西風積雨乾。紺滑秋天稱行草。卻憑秋雁作揮翰。

試墨

金案冰窗淨絕塵。硯寒龍尾澱生紋。澄江清淺汀洲靜。忽有蒼螭下吐雲。

綵花

清寒帶雪未成春。可得芳菲早向人。須遣豔陽歸掌握。故教桃李及芳辰。

送窮

年年瀝酒拜酒晨。風俗新正競逐貧。不用爲文送窮鬼。直須圖事祝錢神。

寄陳州朱教授三首

殷勤寄語朱夫子。僧舍花前亦舉觴。學舍蕭條官職冷。不知誰與戴姚黃。
欲曉山禽百種鳴。最憐啞咤是雛鶯。遙想西湖烟柳色。深春風露水邊聲。
春雨江干不肯晴。大江櫟岸轉雷霆。山頭方丈渾無事。掃地焚香看佛經。

送春

二年江上見春歸。原注。子年春在金陵江上。預想重來我未迴。淹速世閒誰料得。祇應相遇且銜杯。

寓寺八首

門外清泉浸稻畦。西南脩竹作城埤。川平林斷空明處。卻有遙山作翠眉。
道人鐘梵久寂寞。倦客弭車聊靜便。我亦雲山閒衲子。平生香火舊因緣。
病臥淮陽太昊城。牡丹叢畔過清明。那知春暮長江上。竹裏招提聽曉鶯。
江城梅子青時節。嫩紫天紅掃地無。脩竹滿山連草色。卻煩林鳥勸提壺。
翠眉長好何曾損。寄語啼禽漫不閒。應爲殘春足愁恨。長疑鑿破鏡中山。
平曉春雲失半山。濛濛小雨暗江干。寺樓倚徧消殘醉。只有春愁伴薄寒。
錯落星河沒半空。江城悲角五更風。幽人夢斷西窗雨。背壁籠燈到曉紅。
籠燈到曉只微明。獨擁單衾聽雨聲。葛幌竹牀清過暑。蕭然未覺負平生。

黃葵

黃葵貴麗不妖嬈。一朵新晴檻外高。還似邇英臨便坐。瞳矓朝日照天袍。

聽鳴禽

流滯江邊鬢已霜。又聞春鳥暎朝陽。他時北去懷陳迹。寒竹疏梅黃土岡。

曉雨

輕陰江上千峯秀。小雨鰣邊百草生。惟有春禽慰孤客。曉啼渾似故園聲。

黃州酒務稅宿房北窗新種竹戲題于壁

異時小杜高眠地。幾向秋風聽楚江。身世浮雲那可計。試留雙竹守寒窗。

梅花

我愛梅花不忍摘。清香卻解逐人來。風露肌膚隨處好。不知人世有塵埃。

分冬

莫驚人事浮雲變。且作吾儕飽飯行。白首分冬聊自勸。江城今夜一陽生。

食齋糲

論斤上國何曾飽。原注：高力士至黔中見齋云。兩京論斤買。五溪無人採。旅食江城日至前。常慕藜羹最

清好。故應不糲媿吾原。原注：原憲藜羹不糲。

戊寅正月八日早寒

濃淡春雲夜雨乾。寂寥庭院袂衣寒。無人爲發樽前笑。但把梅花似舊看。

正月七日雪晴

西窗融雪飄如雨。故與新春作薄寒。昨夜雁聲渾向北。夢魂隨去過關山。原注：光泰之閒路名關也。

春蔬

新春書劍滯江城。又見南蔬八旅羹。關心太昊祠前路。小甲連畦帶雪青。原注：予有蔬圃。在陳州太昊祠

南。

讀秦紀二首

烹滅羣雄力未疲。赭山射海奮餘威。誰知傳與癡兒子。祇得阿房似舊時。
汲汲威刑繼祖龍。收功終在望夷宮。未應家國歸車府。卻有山東老沛公。

偶成

許君踏月夜相過。此語當時恨已多。但願相逢休怨老。不妨白髮聽新歌。

春日懷淮陽六首

西城門外古濠清。太昊祠前春草生。早晚粗酬身計了。長爲閒客此閒行。

靈通禪刹古叢林。永日惟聞鐘梵音。閱世興亡千室佛。百年風雨古牆金。原注。靈通院。石晉末所創。有千佛殿。壁繪用金。

最愛南城汲井園。春來蔬甲不勝繁。人家斷處無雞犬。遲日東風似古原。
黃巢寨南琵琶溝。古原芳草靜春流。大艣舸舫何處客。牆竿西北是神州。
莽莽郊原帶古邱。漸漸隴麥散羊牛。杏花楊柳春濃處。一片青帘慰客愁。
城中萬枝木芍藥。姚黃一萼得春多。日日踏春渾坐此。人間無醉奈渠何。

柯山集卷二十五

七言絕句

上元三絕

清晨謁帝大明宮。拜賜歸來夜過中。原註：予在祕書近十年。每歲上元長。趨大慶迎駕。近午駕回。駐蹕大慶門。上賜茶酒。拜謝退。率一二同舍。擇勝縱觀。至夜分。必醉歸。歲率爲常。一夢十年身老矣。山城風月作過從。

沽酒壚邊人若市。算商亭下浪連天。張君官况今如此。豈有工夫作醉眠。
江邊燈火似秋螢。哀怨山歌不可聽。自怪今春牢落甚。禪房止酒讀黃庭。

二絕句

衝齋無事雨初晴。山澤有容春向深。何物東風吹不散。祇應多病謫官心。
茅簷斜日曉雞號。水滿陂塘薺麥高。回首故園空悵望。東門歸路綠迢迢。

正月二十五日以小疾在告作三絕是日苦寒

黃土岡頭薺麥長。春陰蔽日午風狂。山前梅落無人見。只有幽禽啼暗香。

春色三分有尙多。且饒芳草占高坡。門前柳色如彭澤。爭奈陶君止酒何。原註：予方以病止酒。
見說櫻桃已爛開。坐愁風雨苦相催。自憐華髮傷春客。兩見飛花未放回。
所居有梅一株在堂東。荒穢中正月二十六日已謝矣二首

平生常恨逢梅少。及對江梅無好詩。寂寞荒山少風味。直須雲鬢插斜枝。
冷落疏枝寒草岡。欲攀先怕踏榛荒。異時折處何堪說。臨水高城倚女牆。
堂前種二桃詩示秬

平昔殷勤向物華。誰知憔悴客天涯。雙桃栽罷還惆悵。憶得淮陽舊種花。
春日書事

蟲飛絲墮兩悠悠。人意遲遲日共長。春草滿庭門寂寂。數樵窗日掛空堂。
十月十夕同文安君對月

林外霜風作夜聲。入簷寒月似多情。燈前爐畔深杯暖。更聽昭君出塞行。
斬水道中二首

蠶老麥枯田舍忙。誰令四月雨浪浪。未容烏鳥私遺粒。鳴蚓跳蛙欲滿場。
綠野新晴風日涼。肩輿細路轉重岡。橋邊野水侵官道。旋喚漁舟渡夕陽。

感庭莎

桃蹊李徑有塵埃。初放青莎秀滿階。想見芊緜古城角。有人嗟我未歸來。
宿潘君草堂聞蛙聲二首

跳跟鼓怒任爭雄。何事嗚呼聒睡翁。不用洒灰煩魯老。正須兩股付吳儂。
孤村足雨菰蒲合。只有羣蛙噪滿陂。我亦閒來無鼓吹。不煩通夕短長吹。

齊安春謠五絕

江上魚肥春水生。江頭花落草青青。萋蒿芽長蘆筍大。問君底事愛南烹。
莫笑江城大如斗。桃花如燒酒如油。人生無病卽爲樂。莫誦離騷澤畔愁。
楊柳弄春藏不得。雪絮點點吹人來。輕清潔白非塵物。寄語桃杏莫相猜。
赤壁磯前江急流。周郎功業莽悠悠。惆悵沙邊雨中樹。無言供作古今愁。
江頭春泥妨踏春。閉門守春春著人。問春著人作何味。半酣美酒聽韶鈞。

衡門

衡門日晏晚雞鳴。下舍人歸半掩扃。邑犬無聲山郭靜。暮天寒月撥雲生。

橘

鶴鶴高林綠實圓。清霜一洗若金懸。李衡何等相奴隸。自有高人相國賢。

梅

覆釜湖邊雪壓塵。數枝林外已先春。盡將七澤清霜氣。洗出姑山綽約身。

水仙花葉如金燈。而加柔澤花淺黃。其幹如萱草。秋深開至來春。方已雖霜雪不衰。中州未嘗見。

一名雅蒜

宮樣鵝黃綠帶垂。中州未省見仙姿。只疑湘水綃機女。來伴清秋宋玉悲。

崇寧壬午臨汝四月始聞鶯二首

青杏登盤櫻壓枝。園林初夏囀黃鸝。一聲風露高林曉。卻覺年華總未衰。好音終在恥爭先。谷外寒多故後遷。已過花時亦何恨。不妨夏木綠參天。

采石阻雨寄宣城故人二首

風雨江頭思故人。東南煙水溼青春。宛溪東岸垂楊樹。想見煙眉亦解顰。閒雲濃淡作朝陰。柳色江頭春已深。誰爲宣城故人說。依依祇似去年心。

漫呈无咎一絕

題扇燈前亦偶然。那知別後遠如天。去年醉舞看花處。獨聽琵琶卻惘然。

壬午臘月下旬偶作二首

啄塊餓禽傍短籬。風鳶一笑起高枝。君看草樹冰霜裏。卽是東風欲到時。風折蒹葭水結澌。燕鴻相語定歸期。淮南水闊山長處。小待燕山霰雪晞。

泊楚州鎮外六首

滿眼荒寒春未知。芳菲欲到野梅枝。東南近臘風煙好。美酒千鍾魚蟹肥。
便風吹舫去無情。漫遣槎牙鐵鎖橫。未嘆客行鷗鳥遠。五更吹角是高城。
襄王席上舊行雲。二十年閒生死分。可惜風流一抔土。年年春草斷人魂。
流落相逢二十年。羞將白髮對嬋娟。如何見我都依舊。添得尊前一惘然。
水樹疏籬秋夜涼。清歌一曲酬瑤觴。明朝回首高城處。只有西風卻斷腸。
莫愁家住大堤邊。朱閣青樓映暮川。斜映清淮一梳月。晚妝相對鬪嬋娟。

東齊雜咏七首

竹

裊裊牆陰竹數竿。秋風盡日舞青鸞。平生愛爾綠瀟灑。莫作封君渭上看。

菊

野人齋爨屏羶腥。自向階前插紫莖。老去愛花心轉薄。一盃蔬飯足浮生。

盆池

點點青萍秋後衰。溶溶晴日見魚兒。水邊窺影何方客。自照行吟憔悴姿。

老槐

雪霜未死閱年華。危葉蕭蕭戰古槎。裊裊秋風官舍冷。半枝斜日帶啼鴉。

皂莢

畿縣塵埃不可論。故山喬木尙能存。不緣去垢須青莢。自愛蒼鱗百歲根。

南窗

門前塵土慵驅馬。堂上文書厭坐曹。只有南窗慰人意。寒燈清夜讀離騷。

道楊

紙閣蘆簾小榻安。一裘容易卻輕寒。誰驚午枕江湖夢。風落晴窗柏子乾。

牆東二首

牆東椿老葉已盡。堂下菊叢無復香。長安風埃歲已晚。閉門不出馬毛長。歲晚長安足風土。天塞官舍少文書。下馬閉門復無事。壁閒佛像對銅爐。

凝祥三首

齋祠太一館清真。望秩名山固有神。斜日苑門人不到。靈風自掃石牀塵。已隨芳草藉盃盤。更任垂楊拂馬鞍。斜日兩竿眠犢晚。春波一眼去鳧寒。奉靈桃李已堪攀。只有春風作往還。園吏不須防客到。長安從古少人閒。

謝人惠金沙醪醖二首

金沙倩麗閨中秀。醅醑謝郎林下風。欲試此心無結習。兩株常守淨名翁。
金沙豐腴合德豔。醅醑輕盈飛燕身。久無丹白應知我。齊散天香供道人。

奉安神考御容入景靈宮小臣獲觀有感二首

靈風依傘繡輿深。仗外猶疑警蹕音。不似尋常遊幸日。樓前鼓吹卻沾襟。
渭上衣冠故老哀。西陵石逕已莓苔。從今仗下新歌舞。長及年年獻耐來。

次韻子由舍人先生追讀邇英絕句四首

天寒書殿曉班清。氣爽仙盤瑞露零。講罷羣公佩聲散。一竿宮日轉槐庭。
聯翩右史直西垣。舊墨螭頭點未乾。自是退之平昔事。可須慙著進賢冠。
冠佩煌煌拱北辰。道人風骨自軒軒。茯苓松下龜龍老。須乞靈丹一粒吞。
恭默誰聆金玉音。陶甄萬物付無心。君王好意真天意。憂國論思不厭深。

荒園

日暖風簷翻乳燕。曉寒露柳轉流鶯。荒園日日東風裏。吹盡閒花香草生。

東海旅夜二首

無酒消憂寒未減。隔帷相對一燈愁。蟲聲喚覺五更夢。風雨滿庭桐葉秋。
蘭缸背壁影微微。千里天涯客夢歸。一夜海風聲不斷。曉來寒葉滿庭飛。

寄李不危

憶昨東風吹馬蹄。瓦關分袂涕交揮。淮陽風物應如舊。獨在柯山送雁歸。

曉發途中

坐無燈火夜蕭然。馬上匆匆未曉天。值驛老兵應笑我。肯將斗粟換高眠。

病起登疊嶂樓

病來久不上層臺。窗有蜘蛛逕有苔。多少山茶梅子樹。未開齊待主人來。

觀蘇仲南詩卷

蘇子詩如刃發硎。十章入耳韻泠泠。文章三昧無多子。祇守君家舊典刑。

讀仲南和詩

異時文席許論詩。三載江湖讀楚詞。自笑酸寒無好語。少年倉氏獨相知。

謝仲南和詩

曾約西湖薄主人。只今湖色已知春。會須多載連車酒。絕勝寒倉滿目塵。

渡沙河

溶漾澄明徹底清。鷓鴣慣客不相驚。卻疑洛水新霜後。八節灘津石柱聲。

題五柳亭

大夫風韻如彭澤。五柳蕭森手自栽。我亦扁舟倦游者。登臨聊復賦歸來。
項城道中

塵壁蒼茫有舊題。十年重見一傷悲。野僧欲與論前事。自說年多不復知。

離京後作七首

蘋芷江邊已五年。厭聞風浪打船舷。南風蕭艾荒涼野。時望高邱一慨然。
水滸送客渾無浪。風解留人卻有情。今夜榆林繫帆宿。卻從北斗望天星。
灌畦沽酒兩三家。春去芳叢有晚花。莫道長安在天上。女牛猶有客乘槎。
一水夷猶達汝陰。年華客意兩相侵。河邊無限青青草。攬轡何人繫此心。
過雨陂塘處處深。南風蕭艾欲成林。道邊拾穗行歌者。亦有豐年一飽心。
高槐老柳舞南風。晴日家家蠶麥中。艾盡黃雲見原隰。卻教風雨洗長空。
燕雀翩翩夏屋深。成蹊桃李已成陰。黃鸝深處無人見。時有清風遞好音。

對菊花二首

官閒身世兩悠悠。種竹栽花一散愁。黃菊叢邊對疏雨。一年懷抱此時秋。
躬耕遇歲真吾事。牛下齊兒婦妾歌。招飲風煙過閒日。遠籬栽菊可如何。

